



1

明詩紀事

丙籤

陳氏叢書
聽詩齋藏



胡元瑞謂孝廟以還詩人多顯達茶陵崛起蔚爲雅宗石淙
匏菴篁墩東田熊峯東江輩羽翼之皆秉鈞衡長六曹挾風
雅之權以命令當世三楊臺閣之末派爲之一振然蹤希宋
體音闕盛唐樂府或創新製疊韻競侈聯篇迨李何起而壇
坵下移郎署古則魏晉律必盛唐海內翕然從之譬之力侔
賁育則勇夫奪氣音希韶護則他樂不請取法乎上勢不得
而阻也今錄天順以後五十年之詩都爲丙集李何則另爲
一集以見振興詩教之功焉光緒丙午孟冬黔靈山樵陳田

序

光緒丙午貴陽
陳氏聽詩齋刊

明詩紀事丙籤目

卷一

李東陽 二十一首

顧清 二十七首

卷二

楊一清 二十一首

卷三

吳寬 三十一首

馬中錫 三十六首

卷四

彭韶 一首

王克復 一首

周謨 一首

左贊 二首

徐貫 一首

虞勳 一首

丙籤目

王佐 一首

張濬 一首

張元禎 一首

陳煒 一首

黃孔昭 一首

陳選 一首

祁順 二首

鄭紀 一首

彭教 一首

陸鈇 三首

張泰 八首

謝鐸 四首

倪岳 一首

劉大夏 二首

陳音 一首

吳希賢 三首

郭璽 一首

倪輔 一首

沈榮 一首

林榮 一首

官廉 一首

桑悅 三首

文洪 一首

卷五

羅倫 一首

程敏政 三十二首

黃仲昭 一首

章懋 一首

張弼 十四首

賀欽 一首

林瀚 一首

陸容 十七首

韓文 一首

潘禎 一首

陸淵之 一首

張海 二首

林克賢 一首

戴縉 一首

卷六

張昇 一首

董越 三首

丙籤目

邵珪 五首

屠勳 三首

周瑛 五首

楊先溥 六首

陳紀 一首

馮蘭 一首

丁鏞 三首

曹時中 一首

李晟 一首

呂憲 一首

李仁傑 一首

文林 二首

鄧庠 二首

楊榮 一首

高昂 一首

胡超 一首

林璧 一首

蕭顯 一首

張黻 一首

卷七

謝遷 一首

王鏊 十二首

王弼 七首

彭綱 一首

徐源 一首

文貴 一首

朱訥 一首

萬綸 一首

楊守陟 一首

楊廷和 一首

劉忠 五首

梁儲 一首

林俊 六首

陳章 一首

李韶 一首

黃文琳 一首

鍾瓘 一首

林廷選 一首

趙寬 一首

張吉 一首

盧格 二首

葉元玉 一首

丙籤目

三

方向 一首

鄭瑗 一首

彭甫 一首

卷八

邵寶 七首

儲懽 十四首

喬宇 一首

王雲鳳 五首

張志清 一首

蔡清 一首

張詡 二首

楊循吉 四首

黃瓚 一首

董樸 一首

貢欽 一首

林廷玉 六首

藍章 二首

陳袞 一首

卷九

費宏 二首

石琦 二十首

蔣冕 二首

毛紀 二首

吳廷舉 二首

陳鏞 一首

楊廉 一首

王鴻儒 六首

吳儼 一首

羅玘 二首

傅珪 一首

李文祥 一首

鄒智 一首

李堂 二首

夏鏃 四首

楊子器 一首

周旋 一首

盧濬 一首

文森 一首

陸完 一首

林光 一首

丙籤目

四

卷十

姚綬 四首

李應禎 一首

周鼎 四首

林景清 二首

金琮 一首

蔣文藻 二首

盧儒 二首

朱應祥 二首

朱存理 二首

卷十一

秦旭 七首

陳懋 一首

施廉 一首

吳文鳳 一首

甘應奎 一首

陸潤玉 二首

龍瑄 二首

趙不踰 一首

劉常 一首

祝淇 一首

賀承 一首

羅頤 二首

劉銳 一首

孔克晏 一首

陳延齡 一首

鄭延 二首

史傑 四首

李仲訓 一首

吳一式 一首

鍾禧 二首

卷十二

秦夔 五首

秦旦 一首

秦夔 二首

陳焯 一首

陳焯 一首

樊阜 八首

樊昌 一首

樊鐸 一首

丙籤目

五

莫藏 一首

莫選 一首

吳鑽 五首

吳元鑑 一首

吳信 二首

吳敏 三首

丙籤

李東陽 二十首

東陽字賓之茶陵州人天順甲申進士改庶吉士授
編修累遷侍講學士歷左庶子太常少卿擢禮部侍
郎直文淵閣參預機務進太子少保禮部尚書文淵
閣大學士加少傅再加少師卒贈太師諡文正有懷

麓堂集一百卷

四庫總目東陽文章為明一代大宗自李夢陽何景明
崛起弘正之間倡復古學文必秦漢詩必盛唐才學
足以籠罩一世茶陵之光燄幾燼逮北地信陽之派
轉相摹擬流弊漸深論者乃稍稍復理東陽之傳以

丙籤卷一

相撐柱平心而論何李如齊桓晉文功烈震天下而
霸氣終存東陽如衰弱舊力不足禦強橫而典章
文物尚有先王之遺風殫後來雄偉奇傑之才終不
能擠而廢之亦有由矣
楊一清石滌類稿西涯先生高才絕識獨步一時詩
文深厚雄渾不為僻奇可駭之辭而法度森嚴思味
雋永古意澗存
詩談長沙李東陽大韶一奏俗樂俱廢中興宗匠邈
焉寡傳

餘冬敘錄西涯先生晚年耽對棊酒春不善棊然毒
村有客未嘗不與頗以為勸先生曰將何消日春曰
詞翰熟自天成足娛日力既惠後生又垂遠世先生
笑曰此後生計吾老不暇為此一日先生在棊酒間
有奉當道命以巨軸乞詞翰者踵至先生弗怡大書
一絕云莫將性命作人情寫字吟詩總害生惟大圍
棋甚遣興客來時復兩三枰春觀之悚然知先生前
意之所在也
升菴集唐子元薦與子書論本朝之詩弘治間文明
中天古學煥日藝苑則李懷麓張滄洲為赤幟而和
之者多失於流易
夢蕉詩話弘治庚戌殿試進士李西涯與諸老讀卷
相與倡和南宮有顧祥非物賈天將吾道付儒紳



雲邊曉日中天見夢裡春雷昨夜聲星辰畫下尙書
履風日晴宜進士巾諸作中最高警句人多誦之
翰林記弘治初上注意講學遣太監戴儀傳示擬意
命學士李東陽等各撰詩十章用寓祝沃東陽擬十
題各撰七言律詩一章曰敬天曰法祖曰勤政曰務
學曰任賢曰納諫曰節用曰愛民曰恤刑曰講武上

嘉納焉
藝苑卮言李文正爲古樂府一史斷耳十不能得一
黃才伯辭不稱法顧華玉邊庭實劉伯溫法不能得
此四人者十不能得三王子衡差自質勝十不能得
四徐昌穀雖不得叩源推委而風調高秀十不能得
五何李乃饒本色然謂十不失一自今觀之奇旨創造名
鱗州讀書後嚮者於李賓之擬古樂府病其太涉議
論過爾翦抑以爲十不得一自今觀之奇旨創造名
崔廷槐樓谿集西涯樂府優於詩
四溟詩話李西涯閣老善詩門下多詞客劉梅軒閣
老忌之聞人學詩則此之日就作到李杜只是酒徒
李空同謂劉因嗜廢食是也西涯久於相位陸滄浪
以詩諷之草聲名高與斗山齊伴食中書日已西回

丙籤卷一

二

四友齋叢說李西涯當國時其門生滿朝西涯又喜
延納獎拔故門生或朝罷或散衙後卽羣集其家講
藝談文通日徹夜率成中以爲常一日有一門生歸
省兼告養病還西涯集同門餞之卽席賦詩諸人中
獨汪石潭才最敏詩先成中有一聯云千年芝草供
靈藥五色流泉洗道機衆人傳玩以爲絕佳西涯將
後一句抹去令石潭重改衆皆愕然西涯卽歸省與
養病是二事今兩句單說養病不及歸省便是偏枯
且又近於合盤成詩西涯續之西涯卽援筆書曰五
色宮袍當舞衣衆始嘆服
存餘堂詩話李文正公懷麓續稿五月七日秦陵忌
日詩云祕殿深嚴聖語溫十年前是一乾坤孤臣林
壑餘生在帝里金湯舊業存舜殿南風難解悞漢陵
西望欲銷魂年年此日無窮恨風雨蕭蕭獨閉門讀
之使人掩卷流涕
詩藪成化以還詩道旁落唐人風致幾於盡瘳獨文
正才具宏通格律嚴整高步一時興起何李厥功甚
偉
王兆雲烏衣佳話西涯李公曾與容聯句折徹褥中
故絮以代燭人或謂其好奇之過余曰不然亦古人
刻燭之遺意耳其次白洲留別詩有看花不厭傷多
酒燃絮還供未了詩蓋紀其實也

國史唯疑李長沙云余今年作詩止詩自戒越兩月
為鳴治師召所督得聯句四章鼎儀聞之折簡告罰
乃以雞酒往受盟鳴治師召以猪紅三斤蛤蜊數十
為助亨父明仲聞亦來稽師召太常音鳴治謝文肅
鐸太平休暇詞臣共詩酒為樂最福德事所飲饌僅
爾儉質具見

列朝詩集文正以金鐘玉衡之質振朱弦清廟之音
命之交響也

明詩選陳卧子云文正網羅羣彥導揚風流如帝釋

天人雖無宗派實為法門所貴

池北偶談海鹽徐豐厓詩談云本朝詩莫盛國初莫
衰宣正至弘治西涯倡之空同大復繼之自是作者
森起於今為烈當時前輩之論如此蓋空同大復皆
及西涯之門牧齋撰列朝詩集乃力分左右袒長沙
何李界若鴻溝後生小子竟不知源流所自誤後學

不淺

高士奇天祿識餘明朝典禮中有慶成宴每宴必傳

旨云滿斟酒又云官人每飲乾故西涯李文正公詩

云坐擁日華看漸進酒傳天語飲教乾蓋紀實也

明詩別裁永樂以後詩茶陵起而振之如老鶴一鳴

喧啾俱廢後李何繼起廓而大之駸駸乎稱一代之

盛矣王元美謂長沙之於何李猶陳涉之啟漢高此

習氣未除不免抑揚太過宜招後人之掎擊也

田按西涯宏才碩學汲引風流播之聲詩洵足領袖

一時惟相業差有可議耳

尊經閣高不可攀前有文宣宮後有鍾陵山

周鑣遜國忠紀周是修江西泰和人建文初為衡府

紀善衛王者建文君弟也尚未之國是修留京預修

纂翰林數陳論國家大計北兵渡淮與蕭用道上書

指斥用事者誤國用事者怒共挫折之屹不為動北

兵渡江宮中自焚是修留書別友人付以後事具衣

冠為贊繫衣帶上入應天府學拜先師畢遂自縊於

尊經閣年

四十九

花將軍歌

花將軍身長八尺勇絕倫從龍渡江江水渾提劍躍馬走平
陸敵兵不能逼主將不敢噴殺人如麻滿川谷徧體無一刀

鎗痕太平城中三千人楚賊十萬勢欲吞將軍怒呼縛盡絕
罵賊如狗狗不狎檣頭萬箭集如蝟將軍願死不願生作他
人臣部夫人赴水死有妻不辱將軍門將軍侍婢身姓孫收
尸葬蒼旻賊平身歸竊兒去夜宿陶穴如生墳亂兵爭舟不
得渡墮水不死如有神浮槎爲舟蓮爲食空中老父能知津
孫來抱兒遠行在哭聲上徹天能聞帝呼花雲兒風骨如花
雲手摩膝置泣復嘆雲汝不死猶兒存兒年十五官萬戶九
原再拜君王恩忠臣節婦古稀有嬰杵尙是男兒身英靈在
世竟不朽下可爲河嶽上可爲星辰君不見金華文章石室
史嗟我欲賦豈有筆力回千鈞

丙籤卷一

四

黃金開國功臣錄花雲守太平僞漢陳友諒以舟師
圍太平雲率麾下三千餘人結陣迎戰三日友諒不
得入乃引巨舟泊城西南士卒緣舟尾攀堞而上城
中乏食雲士馬俱餒遂陷賊縛雲急雲怒罵賊奴爾
縛吾手必滅爾斬爾爲脍也遂奮躍大呼縛盡解
降賊怒碎雲首縛於舟檣眾射之雲至死罵賊不少
變雲妻郗氏生一子煒甫三歲初雲與賊戰方急郗
氏抱兒拜家廟泣謂家人曰今城且破吾夫忠義人
必以身死之吾夫死吾必不獨生花氏惟一兒若等
善撫之雲就擒郗氏赴水死兒孫氏收郗氏屍葬
之遂抱兒欲逃他所爲僞漢軍虜之至九江軍惡小
兒呢孫氏恐見遇害以簪餌屬漁家媪鞠之曰此兒
良宜善視之後王師伐僞漢敗孫脫身至漁家視
見在矚漁人出竊負以走宿陶穴中明日出江許備
舟以渡遇漢潰軍還爭舟楫孫氏及見投之江方出
沒波中有斷木自上流浮至附之入蘆渚中渚有蓮
實孫氏取啗兒凡七日不死忽夜半聞人語聲呼之
逢老父號雷老告之故與其偕行達上所上聞雲見
卽呼入號孫氏泣抱兒拜上上亦泣實見於膝曰此
花雲子將種也命賜老父衣老父已不見追之無所
得衆咸以爲神兒年十三授虎賁後衛千戶後命爲

水軍左衛
指揮僉事

學士柏

我行樹陰日千市雨葉風枝自蕭颯惟有諸生識我情旁人
不解空嘲狎我見先生種樹年我身尙短樹及肩枝蟠江山
地可縮平幹造化天無權瓊臺翠閣何森爽院柳庭花敢爭
長庇蔭長留六月陰盤迴直與孤雲上材堪五鳳難爲用根
到九泉終不枉零落青袍幾故人琮瑋玉佩空遺響當時院
長文安公柯亭劉井相西東百年遺愛豈獨此此樹欲比人
中龍樹猶如此我何似已愧斑白非兒童名收椽桷有先後
壽比金石無終窮下堂再拜想顏色仰面正拂長髯風

翰林記公署後堂有二柏柯學士潛所種潛教庶吉士出學士
士時李東陽承詔受業及東陽復教庶吉士出學士

丙籤卷一

五

柏爲題汪俊有一日百市行樹底之句東陽悵然感
之因衍爲一篇云於是倡和成卷以遺潛之子使
藏焉蓋潛能汲引後
進令人不忘如此

過安平鎮減水石壩有懷劉司馬長句

黃陵江頭河水黃衝沙走石聲礮礮北趨平原下廣澤直使
運道無津梁坐令漕舟百萬若山壅賈船到此徒紛靡帝遣
臺臣出治水水性肆兀難爲降千金作埽萬夫力頃刻下墜
輕毫芒臺臣焦思廢食寢夜夢神禹授以玉簡青琳琅水行
在導不在障豈以土石爭濤瀧地靈順軌水怪伏河遂南徙
歸徐方因高爲陵下爲澤復有石壩磊瑩長如岡豐功偉績
不可以數計此乃餘力非未強憶昔文皇建都向燕薊中導
汶泗通漕綱尙書宋公富經略世上但識陳恭襄武功何人

亦奇士盛以勳績爲文章四十餘年復一決嘆此成績安可
忘帝命儒臣分書刻金石此記正屬臣東陽使船東來一登
眺風日颯爽炎天涼是時臺臣入兵省我在江湖思廟廊但
願此岡不墮河不徒縱有帶礪無滄桑

田按永樂九年濟甯州同知潘叔正上言舊會通河
四百五十餘里淤者乃三之一濬之便乃命工部尚
書宋禮刑部侍郎金純都督周長往治凡發山東第
徐州應天鎮江民三十萬二十旬禮復建言海運經
一受上賞潘叔正亦賜衣鈔十人禮復建言海運經
船險阻計海船一艘用百人而運千石其費可辦河
船容而論利病較然請撥鎮江鳳陽淮安揚州三歲
州糧合百萬石從曾通河運給北風其海道則三歲
兩運已而平江伯陳瑄治江淮間諸河功亦相繼告
竣於是河運大利便漕粟益多十三年遂罷海運雷
陂列卿記云權中微過朝廷督責之革其冠帶止服
儒巾治事其權中微過朝廷督責之革其冠帶止服
頰平江而不及宋禮故邱交莊公嘗過會通河有感

丙籤卷一

六

賦詩云清江浦上臨清閣蕭鼓叢祠飲餞餘幾度會
通河上過更無人語宋尚書後李文正公各有詩其
意在言表卽此詩所謂文皇建都向燕薊中導汶泗
通漕綱尚書宋公富經略世上但識陳恭襄恭襄平
江伯謚也厥後弘治中主事王寵始請爲禮立祠詔
祀之南旺湖上以金純周長配邵文莊歸興詩云漕
隄楊柳昔人功六月清陰處處同我有瓣香何所致
禮官新祀宋司空紀其事也鄭端簡今言公嘉靖癸
卯王湛泉與齡爲文選郎中起用周恭肅公用書故
尚書總理河道忌余日永樂初開會通河尚書宋禮實始
其事西涯詩所謂幾渡會通河上望竟無人說宋尚
書此蓋端簡誤記邱
詩爲李詩附正於此

題清明上河圖

宋家汴都全盛時四方玉帛梯航隨清明上河俗所尚傾城
士女攜童兒城中萬屋翬甍起百貨千商集成蟻花棚柳市
圍春風霧閣雲窗燦朝綺芳原細草飛輕塵馳者若颯行若

雲虹橋影落浪花裏振舵撇篷俱有神笙歌在樓遊在野亦有驅牛種田者眼中苦樂各有情縱有丹青未堪寫翰林畫史張擇端研朱吮墨鏤心肝細窮毫髮夥千萬直與造化爭雕鐫圖成進入緝熙殿御筆題籤標卷面天津一夜杜鵑嘯倏忽春光幾回變朔風捲地天雨砂此圖此景復誰家家藏私印屢易主贏得風流後代誇姓名不入宣和譜翰墨流傳藉吾祖上有先提舉跋獨從憂樂感興衰空弔環州一杯土豐亨豫大紛彼徒當時誰進流民圖乾坤頹仰意不極世事榮枯無代無

都穆寓意編清明上河圖藏閣老長沙公家公以穆遊門下且頗知書畫每暇日輒出所藏命穆品評此蓋公生平所寶祕者觀其位置若城郭市橋屋廬之遠近高下草樹馬牛驢駝之大小出沒以及居者行

丙籤卷一

七

者舟車之往還先後皆曲盡意態毫髮無遺蓋汴京盛時偉觀可按圖而得而非一朝夕之所能者其用心亦良苦矣圖有金大定丙午燕山張著跋云翰林張擇端字正道東武人也幼讀書遊學京師後習繪事工於界畫自成一家又引向氏圖至謂擇端復有西湖爭標圖與此並入神品元正壬辰西昌楊準跋則謂前有徽廟標題後有金諸老詩及私印若干今皆不存長沙公自爲詩細書其後李坤元忍齋雜識王公思質爲手筆害質以清明上河圖故圖寸馬豆人爲宋朝人居間者狷菴名如謂卽儀部敬齋子而思質從甥子嘗見思質任制府日致狷菴手書始悉其由既分宜索取此圖思質故從思質與之思質拒之因白分宜請畫者規其故從思質假金思質云安有一小鳥脚而跨二瓦溝之理分宜大往漏處云傷以圖之微而竟嬰禍殞身君子責備賢者謂思質實自貽伊戚焉董雅事時耶感卿以總蹉旨蒐取古玩不遺餘力時傳督兵使吳越各承奉意旨蒐取古玩不遺餘力時傳聞有清明上河圖手卷宋張擇端畫在故相王文恪

胄君家其家鉅萬難以阿堵動乃託蘇人湯臣者往
圖之湯以善裝潢知名客嚴門亦與婁江王思質
中丞往還乃說王購之蘇人黃彪摹真本應命黃亦畫家
市既不可得遂屬蘇人黃彪摹真本應命黃亦畫家
高酒會諸貴人賞玩之有妒王中丞者知其事直發
置酒會諸貴人賞玩之有妒王中丞者知其事直發
爲贗本嚴世蕃大慚怒恨中丞謂有始末不知然
自此成或云即湯姓怨弇州伯仲自露始末不知然
否以文房清玩致起大獄嚴氏之罪固當誅但張擇
端者南渡畫院中人與蕭照劉松年輩比肩何以聲
價陞重且爲崇如此
田按王氏與分宜構禍之由不僅爲此圖然此圖亦
賈禍之一端也李坤元沈德符所紀各有不同姑兩
存其說後此圖流傳董香光尚及見之見容臺集都
南濠稱賞鑒家王氏所藏卽西涯所題圖也錄西涯
詩附著其事於此

渡江

秋風江口聽鳴榔遠客歸心正渺茫萬里乾坤此江水百年
風日幾重陽煙中樹色浮瓜步城上山形繞建康直過眞州

丙籤卷一

八

更東下夜深燈影宿維揚

四溟詩話李西涯曰詩用實字易用虛字難盛唐人
善用虛字開口呼喚悠揚委曲皆在於此用之不善
則柔弱緩散不復可據真正夫謂涯翁善用虛字若
萬古乾坤此江水百年風日幾重陽是也

寄彭民望

斫地哀歌興未闌歸來長鋏尙須彈秋風布褐衣猶短夜雨
江湖夢亦寒木葉下時驚歲晚人情閱盡見交難長安旅食

淹留地慚愧先生苜蓿盤

麓堂詩話彭民望始見予詩雖時有賞歎似未犁然
當其意及矢志歸湘得予所寄詩云乃潛然淚下
爲之悲歌數十遍不休謂其子曰西涯所造一至此
乎恨不得尊酒重論文耳蓋自是不閱歲而卒傷哉

師召有盲馬售錢六百諭之以詩

六百青蚨十里才忍將筋骨付塵埃驚魂已脫池邊險往事

無勞塞上猜師召已連失二馬斗酒杜陵堪再醉千金郭隗幸重來

知公自是忘機者一笑能令萬事該

餘冬敘錄成化間陳翰林師召所乘盲馬售錢六百西涯先生以詩論之有斗酒杜陵堪再醉之句蓋用子美三百青銅語也時李刑部若虛舊屋為積潦所壞數年不售竟得銀四兩涯翁亦論之以詩詞林馬價知多少即前師召事也前輩居處乘騎如此凡口體之奉可知

海子 西涯雜詠

海子西入城中與龍池連高樓沙口望正見打魚船

西山

磐石傍幽谿羣峯坐回首靜愛白雲來蒼苔濕衣久

響間

春濤夜忽至泊泊溪流滿津吏沙上來坐看青草短

丙籤卷一

九

慈恩寺

水繞池邊樹花垂石上藤長來寺前坐不識寺前僧

飲馬池

立馬春池上沙水清可憐溪翁熟子馬汲罷不須錢

楊柳灣

沙崩樹根出細路縈如棧垂柳隔疏簾人家住西岸

鐘鼓樓

月黑行人斷高樓鐘漏稀城中聞夜警邏吏不曾歸

桔槔亭

野樹桔槔懸孤亭夕照邊閒行看流水隨意滿平田

稻田

水田雜花晚畦雨過溪足老僧不坐禪秋風看禾熟

蓮池

秋風吹芰荷西塘涼意早獨負尋芳期苦被詩人惱

菜園

西園芳意濕不聞春雨聲野人閉門睡園中青菜生

廣福觀

飛樓凌倒景下照清徹底時有步虛聲隨風渡湖水

沉湘者舊集梧門祭酒法式善西涯考略云納蘭容
若涿水亭雜識云李長沙賜第在西長安門西涯呼
李閣老櫛衛是也其別業在北安門北集門西涯十
二詠程篁墩學士和之有桔槔亭楊柳鶯稻田菜園
蓮池而響牖鐘鼓樓慈恩寺廣福觀皆在十二詠中
今其遺址不可問當在越橋相近蓋響牖即越橋下
牖而鐘鼓樓則園中可遙望爾湯西涯懷清堂集題
李文正慈恩寺詩序云喬莊簡跋文衡山西涯圖云

丙籤卷一

十

寺之後曰西涯考公懷麓堂集有西涯十二首第四
篇即慈恩寺其他如楊柳灣鐘鼓樓四詩中亦互見
則慈恩寺在西涯東西涯之名所由來久公因以自
號今亦不能復識其處公詩首篇云幾人城市此曾
遊又云城中尚有山林在集中重經西涯云城中風
景夢中路又云禁城陰裏御河西慈恩寺偶成云城
中第一佳山水則西涯之在城中無疑淥水亭雜識
所云西涯有李長沙別業考其地在今德勝門西予
近年數得經此見風漪彌望直接德勝橋而東有法
華菴在其上意其為當年不特琳宮佛屋切仄無存
亦此地但相去二百餘年之特琳宮佛屋切仄無存
而圖中所有喬木蒼巖長橋斷岸亦不復能仿佛矣
莊簡又云西涯公嶽降地公詩有淚痕應共水俱流
句又云撫今念舊為此愴然集中如禪後述哀云應
謝西涯舊時柳泣風愁雨共依又重經西涯云淚
滿密縫衣上柳又云愛日慚非稚子歡又重經西涯
童鈞遊地白頭重到為何人則莊簡所云嶽降地者
信有徵矣至淥水亭雜識所云公有別業在北安門
外或是舊業非別業也公罷相後客至不能具魚菜
豈能更為平泉木石計余綜諸說與地印證蓋廣
福觀之南響牖之西越橋為文正所生之地後貴顯
厥文正故第當在是煤廠為文正所生之地後貴顯

始有賜第所云李固老衡衡者殆卽其地耶帝京景物畧云李文正公祠近在皇城迤西孝宗賜第也疑水亭雜識似正爲據至於西涯則今之積水潭無疑潭卽水關在諸河極西林木叢蔚水石清幽其先爲法華庵今建滙通祠乾隆二十六年御題也桔槔亭稻田楊柳灣沿洞週逸皆可指識其地距業湖十刹海分流入外卽楊柳灣於澄清間余居其地址不數十武門外卽楊柳灣云其考西涯根據甚詳近賀學博攸與詩鈔引懷麓堂集詰命碑陰記證西涯爲公誕降地而云與篁墩倡和西涯十二詠不盡在別業中蓋不知別業卽舊業也又云西涯十二詠程墩篁和之彭民望亦和之彭詩今佚一涯乃桔槔亭懷麓堂詩話中所云春風滿畦不見野人勞疑卽此作也但懷麓堂集十二詠有廣福觀無明月橋老葵集則有明月橋無廣福觀意者廣福觀一作亦已散佚後人雜取明月橋詩以益之而不知其非也然不可考矣其說近是然明月橋亦距西涯近或偶爾參互當日未定之作云爾

顧清二十七首

清字士廉松江華亭人弘治癸丑進士選庶吉士授

丙籤卷一

七

編修進侍讀以忤劉瑾降編修改南兵部員外瑾誅復故官擢侍讀學士厯少詹事進禮部侍郎罷歸起南禮部侍郎引疾進本部尙書致仕卒諡文僖有東

江家藏集四十二卷

四庫總目顧清東江家藏集皆晚年所自編故體例精審其詩清新婉麗天趣盎然文簡鍊醕雅自嫻法律當時何李崛起觀要將變清所著波瀾氣焰雖未能極倣奇偉麗之觀要不謂之正聲不可也在茶陵一派中亦挺然翹楚矣
列朝詩集文僖詩清新婉麗深得長沙衣鉢正嘉之際獨存正始之音今人以其不爲何李輩所推不復過而問焉斯所謂耳食者也
靜志居詩話東江詩法西涯觀其險韻再四疊用足見能寧當目諸公受長沙衣鉢或推方石或稱二泉或首熊峯以鄙見衡之要皆不敵也
田按東江雖法西涯實導源東坡古歌噴薄鬱盤可與袍菴抗席奔洲輩評詩於附和宜來牧齋之指摘也亦刺刺不休而東江曾不齒及宜來牧齋之指摘也

安山待牖憩大柳下見蜚蜋轉丸及窟穴種藏之狀甚
悉村童語其故詞甚鄙而近於人事戲以韻語紀之
蜚螂搏土丸其智竟莫測中包實糞穢外裹疑橡栗後推前
復挽圍轉何捷疾端如趁嚴程又似銜巧術趨窪真一瀉過
隘亦屢兀中途遇強暴奮鬪幾撐突歸來不少暇坎土啟藏
室旣以首爲舂復以股爲楸爬沙兼負戴下上幾顛越室成
擁丸下劣隘四無隙周旋巧斡運每動輒有入須臾丸盡隱
謂爾功已畢潛身復旁搜坯壤時脆疏村童惡劇戲寸筵時
一搯室開丸反流驚救走連蹶雙趨共撫抱有類拱珠礫前
功已盡棄餘念猶未歇想其推挽去行復事鑽穴物生均有
智小大理難一蠶絲利萬世螯網爲口實蜂房及蟻塚致用

丙籤卷一

七

等軒闥爾丸獨何爲久念理未徹村童前致詞此實神所詠
轉丸輸鬼藏功滿蛻凡骨飛騰作風蟬清響噉雲月營營苟
爲此蜚計誠已劣丸也神所須得無穢明烈物性爾豈知神
姦我能別紛紛詎爲信瓊瓊焉足說聊戲答村童鼓響官船
發次不

臘月廿三日飲德卿宅用涯翁齋居聯句韻

良游集南園秉燭向深夜盟尋舊雨餘坐想重茵藉牆陰有
殘雪鄰酒方索價西瞻太行望皓白欺二華茲惟藏春塢豈
伊凌風榭洪爐赫彤霞餘香裊檀麝牕明疑若空簷短不留
罅吟苦愁後成棋劫鬪先下翻思前夕裏高宴久已罷遠鐘
送深更疲僕催早駕顧茲蚓竅鳴試我蠅頭寫得雋豪屢揮

沈思首頻亞忽看山月高顧影獨驚詫情兼賓主忘氣已芝
蘭化諸公信自賢此夕頗堪訝招要入拘牽窘迫自閒暇詞
非石鼎工酒罄金壘鴻明朝逐餘歡此榻甯許借

望露筋廟作

荒陂下殘月疎木出古祠伊昔露筋媛冥靈此棲遲渺然葭
葦鄉挺此冰玉姿仙骨諒已蛻英風浩無涯想當野宿日甯
與廟食期頽垣不踰肩缺瓦苔參差不知春秋祀有土能不
遺堂堂七尺軀冠帶稱男兒婉婉形勢途所覘在一資使當
生死際甯復顧四維念此欲下拜風檣浩南馳滄波望不盡
目極空煙霏

齒落用前韻

丙籤卷一

七

癡人老猶童覽鏡思妍媚摘白整冠巾謂老真可諱不知齒
牙脫還復可留滯憶昨爾初生玉白銛鋒利相從能幾何竟
作鉛刀廢得非本根撥無乃言語累初危冀猶安凜凜憂爾
墜及茲兩決絕忽若還重寄投非東窗梭去作下坂驥從茲
慎語笑至理得深契

東園餞別太守酒酣劇論至於得失寵辱之際聽之灑
然足夕被酒齒痛不寐輒用蘇長公過清虛堂韻歌
以揚之卒章頌言爲將來世講之章本也

人間萬事真渥沙黃堂昨日猶早衙春風留人苦無言
撲路飛楊花楊花飄揚泊何處碧山夢繞先生家邯鄲已爲
魯酒誤憂喜更足憑晨鴉東園雨餘綠滿樹猶有青子粘殘

葩撫時惜別萬感集飄蕭短髮手屢爬衆賓微酣我輕汗論
功莫計酒與茶花奴羯鼓不解事落日猛向紅闌搥盛時會
須有代謝末俗正爾堪吁嗟歸舟安穩足春夢夢抱玉燕吞
流霞

四月十二日定菴先生過訪誦東坡清虛堂詩用韻奉

謝

夜窗急雨鳴撒沙晨鼓不辨州官衙村童晏眠蓬戶閉榆莢
一徑交殘花經年不及長者室泥水眞作田農家高軒何日
忽戾止豁若隄霧騰金鴉清容穆穆時霜柏妙語郁郁飛天
葩塵埃塞胸不自理次第一一煩梳爬盤餐非惡愧草草幸
有杞枿供春茶此時天公亦助喜列缺捲燄雷停搥騷壇夙
昔願奔走世事八九堪咨嗟酒闌公去倚江閣遙見一鶴冲
高霞

丙籤卷一

六

陪定菴過北野再用前韻

河洲殘水籠銀沙高柳隔岸排晨衙濕雲晴旭互吞吐時復
映空飛雨花人間歲月總能幾年不到先生家諸孫迎拜
肅有禮別時稚語猶軋鴉不知甘露何日降親見紫芝團玉
葩山林朝市各有適如痛須抑癢須爬羊羹龍炙豈不美陸
羽獨好山中茶惜哉禰衡傲一世營門乃作漁陽搥先生歸
來萬事足耳目所及堪吁嗟尊前有酒便一笑不用導引吞
朝霞

時北野先太史墓產芝甘露降庭

爲潘克承題林良蘆雁

林良花鳥今代奇水墨到處皆天機長繖闊幅信手揮妙處
不屬丹青爲江頭雨深菱荇肥枯槎折葦紛離披鴛鴦羽冷
畏遠飛雄雌兩兩相偎依靈蒼翠羽不自危鵠鴒語睇立
衣依棲俯仰各有姿仁見幾欲呼鷹師乃知此老筆不疲市
朝山林時見之雞林相君知白詩君家此本吾無疑北風漸
高禾黍稀雲飛日見江南歸吳江洞庭三泖涯天空水遠無
拘羈焉得扁舟從爾嬉

十二月十八日大雪登樓作寄進之天錫時諸君方修

府志

酸風割耳鬢作虬聞雪強起開西樓西樓一望幾十里玉田
瑤圃爛不收兩年秔稻化魚鼈窮計每日占來牟眼前富貴
已如此何苦更作明年愁書生耐冷自常事北窗清坐端誰
留神游不到黨家帳意行屢上山陰舟淮南山海誕莫考吳
中溝澮須精求映雪著書堪一笑卻似五月披羊裘

進之天錫舜弼有和章再用韻

凍指握筆如拳虬猶有雪詩來北樓北樓幾日不一到寒陣
未許陽烏收瑤琨鷺羽孰堅脆往往精辯聞龍牟長安書生
四十韻遠喜不救溝中愁潁陰禁體亦何事雕刻但有空言
留憑高極目意頗豁滉漾如駕虛空舟珠宮玉宇隔人世一
煖誰爲蒼生謀洛陽盡覆吾亦願尙恐目前無此裘

敬亭見和山行有李杜齊能之句雖主押韻而亦非所
林良當也因歌奉答并寫近懷仍用三江送行韻

梧櫨不雜中林蒸詩人以來稱杜陵公才本高心獨下退與
元白圖中興山行一篇如見我捫蘿踏雪幾凜兢時從雅淡
出奇麗少年斂手不得矜三陽改歲萬物泰和氣上與游雲
凝清河沙河柳色動近山已有游人登南飛六驥想回首足
底不見陰山冰甘泉荷橐事已遠洛橋軋車材弗勝破除寂
寞賴公等往往郵筒侵夜燈朝來雪篇更雄富無復珠貝論
升朋五湖煙艇未許上灞橋驢子還堪乘已聞羔韭畢春祀
忙見柴燎中天升平安夜火報不絕似有車騎來增增蘭臺
執簡公未老長楊奏賦吾猶能掃妖滅怪只一筆取青娥白
應千層眼前卻有兩物惱山中狡兔剡溪藤

春雪敬亭用前韻再答

丙籤卷一

六

西山落日雲蒸蒸漫衍澗谷彌岡陵曉窗夢破聞掃雪失喜
一笑披衣興天街大有隔歲伴羸馬前日猶凌兢常言三白
兆豐稔民病亟矣天須矜從風初學柳絮舞綴樹旋作梅花
凝素娥晨朝紛下女玉龍夜戰迷先登瓦爐煙燄坐不煖起
視膽瓶膠作冰前年冬温人苦疾往歲雨多苗弗勝新春得
此喜可說光景十倍齧山燈忘懷一任鴻寄迹耐久正愛霜
爲朋淮西剡曲總佳語萬騎孰與扁舟乘愁來呼酒徑一醉
斟酌不計斗與升長安薪炭已如玉又報米價江南增閉門
高卧吾豈敢手挽溝壑嗟無能登樓望山一舒嘯銀屏玉案
高峻層何當致我此中去看煮雪茗燒枯藤

吳興公子人中英文學之外百藝精龍紋烏迹窮變態落筆
萬類無潛形畫家難工在狗馬卽物計數皆天成平生所見
凡幾本如形在鑑影在燈君家此幅得何處真迹似是來吳
興前行三匹駿且猶急鞚恐作蛟龍騰一匹顧類未肯行一
匹欲卧垂青纓中間一匹骨如堵四蹶猶帶交河冰紫衫奚
官髮鬚髻胡靴短勒帶紅鞞當年內廐事毛仲幾隨仙仗過
華清興亡百變物盡化惟有遺迹留丹青摩挲絹素三歎息
毛鬣似覺雄風生君不見千金尙買死後骨此馬此人君莫
輕

渡江

昨日渡長淮今日渡長江長江更比長淮闊凌空自有飛鳧

丙籤卷一

七

雙雙鳧飛風不起天青青江瀰瀰眼中不復見塵沙只有青
山如畫裏青山如畫畫不如十年歸夢繞吾廬山中猿鶴休
驚咤從今日日青山下

首夏卽事

金獸香殘晝漏稀嫩槐庭院午風微蜜房分子蜂初靜書閣
垂簾燕自飛小碾試茶催爍鼎輕刀裁葛已成衣故園遙憶
三江外梅豆青青筍過扉

松江志餘東江初入史局賦首夏詩緒句云故園遙憶三江外梅豆青青筍過扉館閣諸公歎賞之謂他日必非嗜進者

出郭

出郭頻瞻尺五天雨餘雲物更清妍樓高紫鳳中天見山躍

青龍到海旋香徑細尋芳草入酒帘低傍綠楊懸微官自笑
成何事間過東風又一年

以燈圓餉陸太僕

三五新正憶故園屑雲糜玉鬧春盤小奴解作江南意遠客
都忘歲首寒梅欲鬪圓忙著子雪如爭巧故成團玉厓太僕
眞清吏莫認明珠按劍看

九日世興席上有感用齊山韻

城闕秋風木葉飛西山落日翠烟微園亭到處花自好鴻雁
來時客未歸短髮有情憐破帽長繩無計繫斜暉尋常遍插
茱萸地目斷江雲空濕衣

元夕未齋席上次趙類菴韻

丙籤卷一

六

合有新詩記此朝好天良會故人招千門華月春殊益三日
東風凍已消銀盃酒香分錦荔綵屏燈影亂虹橋只應不及
雙龍輦飛上鰲山聽鳳簫

時駕在宣府

有懷味茗賦詩未就聞八月二十三夜夢與誦之有所
更定而不甚明了寤而足成

西亭橋下路逶迤中有幽人雙鬢絲長年讀易懶出戶逢人
把酒亦吟詩山田十畝自云足車蓋滿城渾不知何當便了
閒居賦爲說推敲夢裏時

游南莊

春江晴日漾龍鱗笑上蘭舟不問津雲裏遙山指秦望水邊
墟落想春申百年顧我青鞵在雙鬢從他白髮新歸路月明

喧鼓吹鴛鴦撲漉起青蘋

正始薛民望號九山持卷乞詩

西北三江帶五湖九山清勝結吾廬風煙陸瑁家相近水石
王蒙畫不如長日林光圍几席有時空翠落衣裾鶴書未問
他年事門外時來長者車

崔世興宅奉次涯翁韻

酒敵棋朋四座分不知處是東君屏間拂石疑生雨畫裏

看花半作雲

王若水畫梨花杏花甚妙

白雪詞章隨筆散

涯翁席上作草書

紅塵

車馬隔牆紛平生六一堂前士到處春風挹令芬

諸廣文餞予龍潭僧舍別後有懷味荅

聽鶴亭前欲上潮龍潭落木晚蕭蕭愁來別酒難成醉老去

丙籤卷一

九

詩翁不可招地下騷壇自旗鼓人間博局幾盧梟翠蘿金盃
當時句殘月空梁獨自謠

宮體

瑪瑙階邊蛺蝶花玉闌低轉畫廊斜大家近日親經史不向

宮門候小車

出郊

小隊黃衫簇絳燈春來幾度出郊行桃花結子楊花盡只有

蘼蕪滿路生

四北九日鶴塘莊過黃耳祠次高進之韻

五畝園池六尺垣清溪一曲正當門鶴雛牛犢皆詩料賸有

美談留子孫

松風餘韻高進之名企別號西樓上海縣學生莊頭
幾日無人到黃憤生兒鶴長孫進之佳句也有詩名
而詩不一見
附錄於此

楊一清 二十一首

一清字應南雲南安福州人成化壬辰進士授中書

舍人出爲山西提學僉事遷陝西副使召爲太常少

卿進南人常劉氏左副都御史

丙籤卷一

辛



八日酒坊明進黃州麻衣高進之繼

御親敘進
而結不一具

幾日無人到黃憤生兒鶴長孫進之佳句也有詩名
附錄於此

丙籤

楊一清 二十一首

一清字應甯雲南安甯州人成化壬辰進士授中書
 舍人出為山西提學僉事遷陝西副使召為太常少
 卿進南太常卿拜左副都御史督理陝西馬政進巡
 撫總制三邊擢右都御史引疾歸以忤劉瑾逮繫獄
 尋解致仕起總制軍務召拜戶部尚書加太子少保
 太子太保少傅太子太傅兼武英殿大學士入參機
 務再致仕起兵部尚書左都御史仍總制陝西三邊

丙籤卷二

一

召還改吏部尚書加少師太子太師兼謹身殿大學
 士進華蓋殿大學士請老歸職閒住卒後復故官
 贈太保諡文襄有石淙類稿四十五卷詩十九卷

藝苑卮言楊文襄如老弋陽伎發喉甚便而多鼻音
 不復見調

詩藪國朝詩流顯達無若孝廟以還李文正項陽楊
 文襄一清石文隱謝文肅鐸吳文定寬程學士敏
 政凡所製作務為和平暢達演繹有餘覃研不足
 野獲編楊文襄在正德末年以次揆少傅居丹陽適
 武宗南巡以征甯庶人為名幸其第留車駕前後凡
 三至焉上賦絕句十二首賜之楊以絕句賀上聖幸
 數亦如之又有應制律詩諸篇刻為二編名車駕幸
 第錄吳中王交格為詩四章侈其事其最後一詩云
 漫衍魚龍看未了梨園新部出西廂想其時文襄上
 南山之鵷以崔張傳奇命伶人侑玉食王詩蓋紀其
 實也楊是時特荷殊眷徒以邀致六飛為榮而不能
 力勸旋軫僅以冊府元覽等書為獻似垂舊弼之誼
 然能止蘇浙之行則功亦足稱
 靜志居詩話遂菴古詩原本韓蘇近體一以陳簡齋

陸放翁爲師李獻吉送徐昌穀詩吾師崛起揚與李
力挽元化迴千鈞初意揚非李敵不過爲師同耳及
觀石淙集實有高出李者乃知文士以千秋自命類
不輕許人也
田按文襄石淙全集利鈍雜陳其傑出之篇實可與
茶陵旗鼓相當

和楊鏡川學士先生遊南園詩韻

居官僅旋馬致客真無謀諸公不我棄枉駕同郊遊韓家好
庭宇石徑通林邱輕風散炎溽白露淒以秋泉脈灌畦潤槐
陰當屋稠地僻境逾靜身閒心更幽攀芳步南渚觀稼來東
疇詞林有鉅筆古調難爲酬豈徒慰孤陋亦足消煩憂顰眉
擬相效出吻還自籌惟餘江山興歲歲無窮休

甯惟臣話舊有作

京華抗師席英俊紛追隨於時雲路中後先爭奮飛文章華

丙籤卷二

二

館閣論諫光瑣闈聯班布臺省各各能自持荏苒三十年大
半金與緋建立有大小一節無瑕疵得喪不皆齊貴此名譽
垂君居諸子中灑然絕塵姿敬皇樂從諫封事多匡時曾毀
延齡麻不受若訥嗤東藩具瞻地早被朝堂推霜蹠忽以蹶
三年滯嚙司舊物始光復新聞隨颺馳我豈河汾傳敢稱房
魏師姓名幸有託聊以慰衰遲一燈話疇昔離緒千縷絲眷
言平生交對酒安可辭出門冰雪厲萬物斂華滋灰葭動律
管陽回無愆期晚節益自珍持滿須惕而皜皜白苾裳勿使
緇塵縞詩成寄同志庶以存箴規

修武寄陸克深大參約河內一會

玉堂少日瞻風神一麾南去春復春已知氣概抗流俗何止

文章能潤身當時沮遏者誰子鳳池亟奪良有因明廷未乏
班馬輩揣分甘與簿書親敘州九載多勞勩閭閻禮讓風俗
滄黃堂坐嘯若無事盤錯到手紛如塵功成進佐七州伯褻
帷處處宣皇仁行河決獄總經義以儒飾吏斯言真任渠喜
事笑迂腐忍貪勞伐聽吟呻西州過客問民吏共道我侯爲
吏循因君重感蒼生念四野觸目雙眉顰直從徐揚向懷衛
白屋蕭條生意屯黃河流徙固天數勝天有術須吾人雖云
盛平異卵累亦可先幾憂厝薪公才自是濟時具恨不專制
當通津杞天漆室本迂誕愚者一得公休嘆相違百里阻歡
合策馬欲進仍逡巡北風吹沙天宇暗後庭殘葉聲相聞乃
知良會不易得聊以尺素通殷勤交神命駕如有意或者河

丙籤卷二

三

丙逢寇恂

和蘇長公聚星堂禁體韻

風團一掬枯桐葉瓦爐活火初烹雪是時冥宰設奇觀物態
人情兩幽絕懸崖老樹僵不死生意往往存摧折江山一色
天冥冥鳥影不度人蹤滅孤舟把釣吾所愛有肘真被微官
掣急呼紅燭照金杯不覺醉顏生綺襖歐蘇白戰有嚴禁餘
子效顰徒瑣屑今我不樂真成癡半百光陰過如瞥嗚呼世
人多附熱此興蕭蕭向誰說君看桃李門春妍諶道廣平心
似鐵

富春道中

遠嶼迷新漲回汀帶急流野花疑送客江月巧窺舟獨坐成

遐想逢人話舊遊煙霞何處所吾亦愛尋幽

東河驛

秦嶺暮衝雪東河朝履冰孱軀一偃僕病眼雙曹騰凍鳥住
不住亂山層復層夜寒愁擁被無語對孤燈

偶述

垂髫謁紫宸四十一回春年如下坂路身是未歸人故國青
山舊窮邊白髮新世情自翻覆吾獨任吾真

瀛海道中雜作二首

潦倒思鄉客遲迴溯浪舟樹連雲外寺城帶海邊樓病濕偏
愁兩年衰不奈秋偶然談世事猶動廟堂憂

天空秋有籟海近夜通潮獨樹如相待羣鷗不受招貧餘詩
券在愁仗酒兵銷何用談生計故山隨老樵

丙籤卷二

四

宿子午鋪

躡磴穿蘿路轉遙夜寒燈火正蕭蕭官程仍出子午谷鄉夢
遠懷丁卯橋秦嶺天無星斗近漢江春煖瘴嵐消馳驅敢作
賢勞嘆愧乏涓埃答聖朝

江上偶吟

浪花搖曳急流分徙倚船窗日又曛萬里江山低度鳥一林
春樹半含雲帆歸驛路看看近岸有漁歌歷歷聞莫向朱絃
揮楚調別情鄉思轉紛紛

迎建儲詔

八葉重熙戴寵靈萬方和氣擁明廷虹光下繞坤宮赤春色

潛浮震殿青江漢有潮歸少海華夷隨地仰前星遙知問寢
龍樓日帝範分明列御屏

謁睢陽協忠廟

一旅閒關百戰中漁陽鼙鼓避英風城危竟失江淮蔽義正
終收郭李功滅賊死甘爲厲鬼擁兵身恨失奸雄年年明水
祠宮在不愧前朝表協忠

送王司徒提督貴州軍務

萬里車書燹道通夜郎何事阻華風我公舊有綏懷略此去
休論戰伐功八部蠻煙行處盡盤江春瘴洗來空都勻白骨
憑誰念風雨啾啾恨未窮

一笑

丙籤卷二

五

落落長風捲岸沙倦餘行子合歸家訛言正愁市上虎酒影
一笑杯中蛇曳杖閒行隨野鹿看兒默坐數棲鴉向來寵辱
休重問只此優游度歲華

謁咸陽王廟

廟在雲南元平章賽典赤治滇有大功

香火高城廟貌崇邦人相對泣遺忠漢廷才望金車騎唐代
勳庸渾侍中地盡關山開禹迹人於絃誦識華風車書又屬
文明運猶有新碑紀舊功

秋興

倚棹江天百感生倦扶筇杖且閒行蕭蕭紅葉夕陽下冉冉
白鷗秋水明飲量暗隨詩力減路歧眞向老懷平蒼蠅不省
寒將至何處飛來漫作聲

巡邊偶作

一出頻看隴月圓朔雲回首隔晴川
鄉心已落征鴻後行色還當小雪前
二十年來三建節六千里外五籌邊
亦知保障爲長策全陝蒼生望息肩

渡江 三首

黃塵脫屣一身輕十載無功恥聖明
獨立江風吹短髮渚雲汀草各關情

江頭如聽可人招鼓柁放歌歌沈寥
秋色滿船月皎皎水聲入樹風蕭蕭

玉關人老貂裘做白雪歌寒鐵硯存
已辦輕車隨款段尋幽日日水西村

丙籤卷二

六

正歸人老... 人壽... 丁... 草... 文... 鳳... 數... 一...

丙籤

吳寬三十一首

寬字原博長洲人成化壬辰第一人及第授修撰歷
諭德庶子少詹兼侍讀學士擢吏部侍郎掌詹事府
入東閣專典誥敕進禮部尚書贈太子太保諡文定

有匏翁家藏集七十七卷

四庫總目吳寬學有根柢為當時館閣鉅手平生學宗
蘇氏字法亦酷肖東坡縑素流傳賞鑒家至今藏弃
詩文亦和平恬雅有鳴鸞佩玉之風以之羽翼茶陵
實如駢之有靳
麓堂詩話吳文定原博未第時已有能詩名王辰春
子省臺湖南時未始識也蕭海鈞為致一詩曰京華

丙籤卷三

一

旅食變風霜天上空瞻白玉堂短刺未曾通姓字大
篇時復見文章神遊汗漫瀛洲遠春夢依稀玉樹長
忽報先生有行色詩成獨立到斜陽子陸辭日見考
官彭敷五為誦此詩戲謂之曰場屋中有此人不可
不收敷五問其名曰子亦聞之矣已而果得原博為
第一亦奇事也原博之詩釀郁深厚自成一家與亨
父鼎儀皆脫去吳中習尚天下重之
震澤集文定為文不事追琢獨嚴體裁為詩沈著高
壯一洗近世尖新之習作書姿潤中時出奇偏雖規
模於蘇而多所自得
容春堂集匏翁詩如漢循吏所至無赫赫聲而去思
不已世或模擬之鮮能似也
習
藝苑卮言吳匏菴如學究出身人雖復間雅不脫酸

吳

朱承爵存餘堂詩話吳文定詩格尚渾厚琢句沈著

門事果切無漫然嘲風弄月之語雪後入朝詩云天
正憂高處不勝寒饑烏隔竹餐應盡馴象當庭鷓又
殘莫向都人誇瑞兆近郊或恐有袁安愛君憂國感
時念物之情藹然可掬
筆精東坡遊赤壁時有綿竹道士楊世昌同遊赤壁
賦云客有吹洞簫者卽世昌也吳匏菴詩云西飛孤

鶴記何詳有客吹簫楊世昌當日賦成誰與注數行
石刻舊曾藏此一證也
田按純翁詩體擅臺閣之華氣含川澤之秀冲情逸
致雅製清裁是時西涯而外當手屈一指

入玄墓寺

高登鄧尉山遙入玄墓寺老僧具衣履出門迓予至落落長
松間一徑獨深遂鞞鞞鐘鼓聲鳥雀少驚異仰面睇山腰殿
宇危若墜長廊埽清風修竹自爲簞結夏四五人跌坐更無
事樹密山果懸草深井泉祕盤旋登小樓洞庭正相值洋洋
太湖波兀兀林屋翠始知衆山中此寺眞畫笥聞昔萬峯老
卓錫據茲地道行旣孤絕遺言有高致化去動吳人金帛爭
布施歲久骨當朽遺容未全徹禪室晝寂寥雲水乏供饋惟
餘佳山水不改太古意磨厓紀勝遊吾當一題字

丙籤卷三

二

爲王希曾題啟南長蕩圖

吳綾八尺餘遠勝好東絹坐移長蕩來歛向眼中見按圖想
舊遊巒嶺開生面陽山踞獨尊虎阜奔而殿柔櫓一搖搖船
頭翠痕轉春水澹若空白雲故多變化佳哉吳中景獨許沈郎
擅典客方壯年孰云宦途倦吾志每圖南欲趁秋風便幽深
付一筇此樂人無羨

題海虞錢氏所藏王均章虞山圖

扁舟昆湖去憶向虞山還當時迫日暮未得窮躋攀至今三
短章寂寥不重刪安知六載後依然見茲山諒無愚公愚賴
有頑仙頑頑仙隱居處深林置柴關丹竈火常伏藥闌苗載
芟高情付繚素丹青色斑斑茲山卧平野隱然不成環逶迤

亦甚遠攢蹙何其慳只尺見百里羣峯互垂鬣飛鳥歸易沒
浮雲出偏閒拂水最奇麗空巖故漩漫天風或稍定石壁仍
潺湲仙宮對佛寺妙境非人寰獨憐仲雍墓誰爲翦榛菅短
棹載書卷浩歌水雲間彷彿歸菴翁往來寶巖灣竊祿本無
補乞身亦多艱卧遊畢舊願坐笑開塵顏

爲楊應甯僉憲題畫

勝地着孤亭翼然臨絕岸杖屨復溪頭斯人來獨慣青松栽
已高白石煮應爛詩思逐浮雲峰回忽中斷

爲盛舜臣題山水長卷

城西蕩雙槩遙背伍胥門人家枕河住漸喜歷鄉村豁然見
平田農夫荷鋤去好風低嫩苗微雨灑高樹葦間多放艇柳

丙籤卷三

三

下或扳罾錦布菱荷蕩沙明鷗鷺汀魚梁接牛宮沽酒新郭
市迤邐到橫塘虹橋垂四趾亂山似遮路旋轉自長溪水入
太湖北雲生光福西叩舷唱吳歌有客中流過千載懷古心
悠然欲相和香徑旣云沒琴臺亦成空山頭明月上仍照館
娃宮登高信徒勞望遠發深唱聞展圖畫看舊遊一何類

陸天遊畫

脩然掩陋室幸此絕塵鞅偶開水墨圖頗慰山林想危岑瞰
深碧湖水平如掌喬木四五株秋氣始蕭爽不逢弄舟人似
聽伐木響一老足高致多暇自來往落照變巖姿臨流更欣
賞

秋雪歎

吾生本江南不慣見秋雪見之自北都都人亦不說初借雨
兼零忽逐風急刮漸看瓦溝平似畏石城滑陡然作寒威貧
家勢難活米炭幾時儲齏鹽何處斡以至裹曲身況也無衣
褐病體強自支憂世亦頗切茲事已兩見浹旬未遑潤月令
不深考政事何所缺惟天量有容陽氣終奮發赤日中天行
窮檐遍昭晰涼颺只淒然勿遽變凜冽霏霏嘉瑞成卻待嘉
平節

題畫

誰持畫障索我歌見畫如向江南過扁舟坐我順流去兩岸
不斷山嵯峨山中老樹青婆娑雲深難辨枝與柯渺然一片
漾微白千頃平湖生遠波想當若人作此畫墨汁如雨流滂

丙籤卷三

四

沈夕陽落盡板橋上何彼行客偏么麼我生固有山水癖猶
道圖畫傳來論昨朝騎馬出城去看山直到燕山阿千巖萬
壑青不了較之江南山更多長溪淺渚舟如梭亦著漁翁披
綠蓑青鞋布襪不曾辦馬背未必愁坡坳若非塵鞅縛人住
山水佳處須行窩題詩自笑徒吟哦佳哉此圖如我何煙江
疊障寫長句我亦年年嫌老坡

趙松雪長江疊嶂圖

李貞伯藏

長江滔滔向東瀉憶昔扁舟順流下慈悲閣前浪花白兩岸
青山似奔馬蒹葭楊柳風颺颺江行六月疑深秋歸來已是
十年事看畫偶然思舊遊江流樹色非邪是仍見山腰隱高
寺赤旂滄洲杳靄間只尺悠然起愁思蒼溪影落鷗波亭王

孫弄筆何時停北來戎馬暗江滸千古遺恨歸東溟

謝孔昭臨黃大癡畫

大癡道人避世士移家舊隱虞山裏早年能畫老入神落筆
虞山宛相似深林依稀村塢重水口近與昆湖通高岡碗碗
勢欲墮此老前身黃石公百年以後誰其亞昔者吳門稱老
謝案頭臨畫似臨書咄咄逼人真可詫風流前輩杳難攀諱
語空傳謝疊山窗中遠岫依然在天際春雲仍自還

孔昭善
畫山自

稱謝
疊山

李世賢持啟南雪嶺圖索題次韻

小徑升堂新築沙退朝無事還私衙誰移雪嶺入我屋老眼
白日疑昏花坐遊未覺足力倦倏過野寺仍山家淺溪舟膠

丙籤卷三

五

集凍鴨空谷展響翔飢鴉狂風入林一攬動零落玉蕊兼珠
葩此時誰埽林下白急欲往煮僧房茶忽然仰面見高寺扣
戶還須持馬槌長安十年走薄宦對此似將塵土爬西湖尋
僧天欲雪蘇子故事今人嗟清虛舊韻更可借捧硯獨無王
子霞

題趙子固畫蘭

王孫弄筆成墨藪九畹依然連百畝開圖墨瀟將誤拾撲袖
香風不勞歟破縑零落三百年非藉好事安能傳寸根無土
強生活鄭老後來真可憐

爲屠大理題石田畫

生綃丈許畫者誰石田老人今畫師年來都下家家有此幅

吾知出親手筆意縱橫信所之夾岸儵然已疏柳溪陰欲渡
無舟楫萬杙成橋遠相接何處詩人跨瘦驀破帽欲風粘落
葉兩山對峙開高關豁衍梵宇容千間半空丹雘勢突兀雪
竇天台眞等閒老人昔共遊虞山此景彷彿曾躋攀昆湖蕩
漾臨几席水繞漁莊凡幾灣京華十年走塵土看畫分明能
破顏山林在望鳥飛倦春到江南吾欲還

郭熙雪浦待渡圖

宋人能畫非等閒郭熙絕藝如荆關御府收藏三十軸玉堂
猶自遺春山橫圖若此纔數尺春山相逢應厚顏北風怒號
振平野巖石吹墮林河彎望中慘慘皆雪意飛鳥未倦爭飛
還何人翦水作六出山上陞失千青鬢渺然上下同一白但

丙籤卷三

六

見空林楓葉殷流泉不流凍作滴豈似雨過聽潺湲羣猿入
洞失連臂文豹藏窟無一斑須臾坑谷盡填滿萬頃蕩漾仍
澄灣野航載客遙在望舉手招呼急欲扳冰花粘棹行尤澁
雲低落日懸孤環往來浦口屢涉險未識舟人心苦艱擁裘
馬上莫相笑山南捷徑非人寰

東坡樂水圖

東坡樂水圖

右手按膝左手戟長帽不着毫氣溢此翁豈是尋常入眉山
秀出文章伯擘開青峽噴玉泉石罅百折猶轟然山中自當
一部樂何用嘈嘈鳴管絃惠州飽飯運無事羅浮之西山嘯
起白水留題屬此公萬里來遊天所使黃衣脩然戴小冠水
樂同爲杜牧看圖中不是程正輔方外當爲鄧守安

題楊鐵崖墓銘後

泰定年間名進士會稽山下老徵君金陵不看三秋月立圃
長嘯五色雲對客呼兒將鐵笛從人笑我醉紅裙風流盡付
吳淞水還繞劉伶四尺墳

過橫塘

夏半橫塘風日多畫船載酒壓晴波高田得雨皆秔稻長蕩
翻雲足芰荷未必他年成故事也須隨處結行窩悠悠十里
城西路此是登山第一歌

舟經荻蒿阻風留宿王柳夫田舍

歲暮江村落日懸誰家魚網設平田岸頭行客訟風伯堂上
主人疑水仙斗酒急呼聊慰藉扁舟欲去重留連荒溪白屋

丙籤卷三

七

炊煙少縣吏那堪橫索錢

寄光福徐雪屋

吳下隱君徐雪屋久緣山水伴漁樵孝廉有士還堪薦貧賤
於人真可驕書卷夜當巖月展布袍寒傍渚風飄銅坑深處
楊梅熟尙憶題詩坐石橋

送王允達後飲通法寺西軒

杯酒頻將別恨澆日斜酒盡卻無聊獨嫌去客忙騎馬更欲
尋僧懶度橋小圃杏花春尙淺長溝流水意俱遙年華似與
人相約牆外鞦韆映柳條

送劉職方時雍赴福建參政

早振詞林五色翰廿年郎署忽彈冠校書劉向成新序判事

姚崇起夏官楚客不驚湖海闊閩山能隔雪霜寒他時召伯
甘棠樹只是南風荔子丹

題啟南畫

閉戶蕭然亂雪中已無賓客晚堂空
梧楸獨據忘爲我老筆能揮愛此公
卻構石闌臨絕澗似聞茆屋卷秋風
十年別卻西莊路歲暮相思白髮同

謁耶律丞相墓

在瓮山下前有石象鬚分三線其長過膝真異人

角端人語大兵還帷幄功高掩伯顏
身託中原只抔土神歸朔漠自重關
僧伽香火青松盛翁仲風霜白石頑
遺象儼然驚嘆久一間空屋倚西山

飲玉泉

丙籤卷三

八

龍唇噴薄淨無腥純浸西南萬疊青
地底洞名疑小有江南泉品類中洽
御廚絡繹馳銀甕僧寺分明枕玉屏
曾是宣皇臨幸處游人誰復上高亭

賀秦修敬八十

扁舟憶泊錫山東十載丰神夢寐中
巢父釣竿隨海霧陶僊笙樂坐松風
朝廷錫誥還因子鄉社評詩合讓公
第二泉甘眞可釀百杯春酒莫教空

次韻達賓之作書戲效拙體

書家新樣出眉山若擬丰姿定玉環
硯沼百坡空對影管城一孔但窺斑
臨模惡札勞唐楮結構奇材得魯般
此意亦知聊戲我試看攬奪語尤頑

來詩小序有勿怪攬奪蘇家行市之語

麓堂詩話吳文定善蘇書子嘗作簡戲效其體文定
作斑字般字韻詩戲子力和答之往復恐斑首過吳
字有曰心同好古生差晚力欲追君鬢恐斑頭帖畫虎
箋猶送錦擲殘湘管半無斑換羊價重街頭斑畫般
心勞紙上斑雲間天馬誰爭步水底山雞自照斑般
字曰聊以師模歸有若敢將交行比顏斑鄭師仁許
時困楚般文定詩大有佳句今失其稿求之未得也

竹園壽集

七客同期賀誕辰古詩三壽句如新合爲一百八十歲

做樂天語

總是東西南北人露下高松如細雨風迴曲徑捲湘筠杏園

雅集今重見良史當筵亦寫真

匏翁家藏集太子太傅吏部尚書鄞屠公太子少保
戶部尚書曲陽周公都察院右都御史軹城伯公同
生正統庚申至今弘治己未同躋六十伯公之生差
先屠公稍後介其中爲周公乃五月四日也是也史烏
僚友若吏部尚書祥符王公太子少保左都御史烏
程閣公吏部左侍郎舒城秦公戶部左侍郎靈寶許

丙籤卷三

九

公右侍郎睢州李公右副都御史臨淮顧公及予七
人卽因公私筵之後圍置酒合賀情好甚洽賓主盡
醉皆以爲自有壽筵以來無若此盛者予忝預茲集
乃首賦四韻爲倡諸公咸和之秦公別集古句諸公
又和之周公復自有作又咸和之皆以錦衣二呂君
以來亦無若此盛者坐有善繪事者爲錦衣二呂君
屠公揆宣德初館閣諸老杏園雅集故事曰昔有圖
此獨不可圖乎二君遂欣然模寫各極其態因按其
次第繫於卷中其始蒞湖石坐者左爲伯公右爲許
公一童子拍手導鶴舞以娛之爲周公坐稍遠使其
二子共具柏日大學生孟捧杯前行仲公爲刑部主事
曾方拱立聽命竝立竹間者左爲李公右爲顧公皆
疑然有思若索句狀屠公則章已成一童子捧硯從
竹下書掠石案而題卷者爲子所思坐而持筵者爲
王公執麈尾者爲閔公亦若有所思者獨坐而握卷者
則爲秦公其集句已就之時數若二君左爲紀右爲
文英展畫並觀而圖終焉園中草木非一種而竹多
且茂故以竹園壽集題卷首卷成轉寫各得一卷藏
于家又出屠公之意云是歲六月二十八日吏部左
侍郎長洲吳寬序

題畫

漁舟凍不移況有樵斧響占斷梅花灣甘爲五湖長

竹禽圖

江南煙雨竹枝低一箇子規枝上嘯日暮不須嘯更急行人
初到秣陵西

次韻天全翁遺光福徐用莊雪湖賞梅

永和人物數諸王曲水難勝一野航得似太湖三萬頃梅花

灣裏作家鄉

王澹游歲寒圖

後有王叔明題

修竹風回玉珮清松聲相和紫鸞笙北人不識梅兄面莫怪

王蒙說手生

馬中錫 三十六首

丙籤卷三

十

中錫字天祿故城人成化乙未進士授給事中出爲
雲南按察僉事改陝西入爲大理少卿擢右副都御
史巡撫宣府引疾歸起撫遼東召拜兵部侍郎以忤
劉瑾改南工部尋勒致仕逮繫詔獄斥爲民瑾誅起
撫大同遷右都御史提督軍務進左都御史以師老

無功下獄尋死獄中有東田集六卷

孫緒沙溪集東田詩憫時痛俗以極於體物盡性而
要諸變雄渾深沈無急蹙狹小之病間於閨情幽思
旅懷宮怨以自況而閒情逸興時得之諷誦之外
田按東田集句律渾成有明珠走盤彈丸脫手之妙
是時茶陵執盟詩壇東田
別派孤行可謂特立之士

春詞

紅梅花插銀瓶小紫降煙隨金篆鼻病酒偎香起尙遲流蘇

帳煖雞催曉是誰偷捲繡簾窺庭院推鹽總不知小立風前
梳洗罷笑團雪打綠衣兒

幽居

幽居人不到撫景自流連露重花垂地風狂絮上天鶯聲行
酒曲榆莢買春錢只恐王維過相疑是輞川

冬夜偶書

甲第慵投刺朝衣瘦不勝睡於冬夜足詩向閨年增家近通
書易官貧立券仍幾思歸粟里江守欠王弘

有所思

想象當時貌雲鬢內樣梳鞦金描蛺蝶領玉綴蟾蜍淺黛春
山遠嬌姿豔杏初而今成間阻何處可通書

丙籤卷三

七

過懷安廢城

古城多年廢牛羊散碧蕪水聲南入漢山勢北連胡士馬乘
秋簡旌麾向曉徂所希邊報靜麟閣未須圖

西菴

坐愛禪房靜來憑曲徑通荳花先雨白柿葉未霜紅籬犬金
絲小林烏玉項同猶嫌城市近或有趁齋翁

同錢大用早秋遊西園

池選入西園花香襲酒樽門臨三汊水橋枕獨家村午樹團
清影秋苔滑紫痕幸陪熊軾老一醉各忘言

暮春寫懷和貫道韻

官袍顏色半凋零過盡東風坐小亭燕子不來簾未捲桃花

亂落酒初醒鏡中短髮三分白門外西山十里青無那官閒
清晝永呼兒讀取楚辭聽

早春省中試筆

畫廊簾幙捲東風退食今朝又自公向煖柳條才半綠怯寒
花朵未全紅朝衣正辦江頭酒方藥難醫左耳聾何日上章
辭北闕扁舟去趁陸龜蒙

和劉振之感懷

垂柳陰陰覆苑池省中春去吏先知宮鶯捎蝶衝開幔簷雀
將雛過別枝盡日阜囊無一事幾時黃色見雙眉爲耶愧我
身先老白髮年來漸覺私

追和振之山行過廣善寺

丙籤卷三

七

寺僻林幽石徑踪案頭經卷是楞伽犬閒長晝眠芳草僧背
斜陽掃落花一幔隔村題酒店亂盪臨水晒漁家偶來竹院
留詩在香積廚人爲具茶

夏日病中卽事

心如病酒縈飛絮情似傷春對落花茅屋睡殘聞布穀葦籬
編就架薤瓜客來具飯還燒笋僕出分泉自煮茶誰向山中
飽語此笑人騎馬候東華

陳千戶莊上卽事

彷彿裴家綠野堂柴門茅屋竹牀方近檐雲宿林花潤隔隄
風來水稻香白鳥度山秋欲暝紫駟駛醉路偏長相過此地
年來幾回首人間吏事忙

秋夜不寐感而有作

白頭搔短對殘缸，寒鼓聲沈月到窗。
爲客不逢牛渚謝，攜妻欲學鹿門龐。
愁憑酒破須頻酌，病與詩塵未卽降。
卻憶扁舟歸去者，蘆花今夜卧秋江。

省中覆和李汝弼韻

白首叨陪鵷鷺行，北窗爭似傲羲皇。
酒開春甕愁仍醉，花落風簾夢亦香。
夜雨溪聲來枕近，夕陽山影到門長。
自慚岐路迷歸轍，猶戴朝簪直省廡。

立春後禁直

禁門深鎖隔呆恩，吏散空階鳥下遲。
殘雪未消鳩鵲觀，煖風先到鳳凰池。
一官多暇文書靜，十載無能鬢髮衰。
便合放舟

丙籤卷三

三

江海去，豈應常戀好文時。

挽鄧廷曜編修父

門外閩山遮莫青，烏皮几在更誰凭。
圖書壓架思玄晏，水竹移居失杜陵。
墓石文章鐫細字，影堂風雨暗孤燈。
可憐東省西曹客，總爲阿翁淚滿膺。

王太史園亭同明仲洗馬圭峯侍讀西涯侍講日川修

撰正夫提學小飲

再到王猷看竹亭，新梢無數入簾青。
酒開上若斟瓊液，門對青山列畫屏。
晝永陰雲垂兩腳，樹深幽鳥墮風翎。
相逢莫漫談曹事，恐惹花枝笑獨醒。

卽事

春雲低樹鶉鳩鳴清曉登樓野望平近郭人家初播種養花
天氣易陰晴危欄偶受東風倚芳草偏勞遠客情況復日來
新病起沈腰消瘦可憐生

同泰上人縱步東園

散策東園一徑斜去城尺五未爲賒春光試煖先楊柳風信
猶寒困杏花心靜久無朝報擾眼明應少市塵遮從遊此地
誰爲伴惠遠年來鬢亦華

閨怨

羞把高樓玉笛吹玉人心不似當時歸期屢負金錢卜別恨
虛勞錦字詩醒後酒痕猶的歷病中花事已離披口脂面藥
無消息執扇秋風冷漢姬

居庸關

丙籤卷三

古

野色微茫日下春長陵西去是居庸貌貅萬竈關門戍龍虎
千年王氣鍾地險不須勞北顧時平端可笑東封我來總爲
宣威德令尹毋嗔著迷慵

白瀑寺

在居庸關西百里寺中畫壁碑志皆金大定年
物也

白雲深處萬重山寺在雲山杳靄間四壁丹青圖海會斷碑
文字紀完顏唄餘盤石僧初定齋罷生臺鳥未還世上紅塵
應不到正宜長日掩柴關

德勝寺

山寺樓臺帶晚霞從來車馬不聞譁青松樹下盤陀石綠水
橋邊躑躅花老宿殘經猶在案前朝斷礎半沈沙行人不解

悲遺事爭向村中問酒家

浮圖峪

關城樓櫓出層雲獨自憑高日又曛
易水遺墟燕太子飛狐故道李將軍
戍連朔漠兵威盛山隈幽并地勢分
珥節怪來無一事虞廷長夏奏南薰

秋 日 西 園

散策西園一徑幽袖風巾雨足淹留
鳧鷖塘淺蒹葭晚蟋蟀籬疏惹苒秋
怪事謾勞書咄咄別名還擬號休休
客來莫共談機事抱甕先生已白頭

落花

枝枝狼藉畫闌東眼底穠華又屬空
弱質可禁三月雨香魂

丙籤卷三

五

易斷五更風乍離芳樹應思綠欲點
蒼苔不惜紅一片無何終萬點曲江
愁殺杜陵翁

訪西庵有懷舊僧

門掩空林叩不應西庵猶記舊尋僧
花深無路迂雙屐苔滑逢橋仗一藤
風外吟髯吹短折水邊病骨照稜層
年來一鶴猶堪煮何事支郎卻養鷹

早春半里橋散步

芳草連村柳蘸隄橫塘北去小橋西
淺黃乍泛鵝兒酒嫩冷猶欺燕子泥
細雨有時沾袖濕閒雲無力度牆低
瀛南獨客掀髯笑一瞥風光直品題

泊南旺湖連日阻風

荒灣斜日艤扁舟病眼逢春恰似秋鄉思如雲俱北去閒愁
隨水不東流爲驚旅夢憎黃鳥未息塵機愧白鷗明日謫仙
祠下過石尤風定一登樓

過分水祠

此地殘年又一經掀篷垂柳正青青雲煙斷處山光出鷗鷺
來時水氣腥市酒一旗風外裊漁歌雙槳月中聽同來誰道
貞元客萬慮全友兩鬢星

絕句

春草碧連天春鶯黃妬柳行人歸未能且醉長安酒

促陳元溥遊水雲亭

萬里橋邊黃四家水香雲煖小亭斜少陵頭白猶強健肯許

丙籤卷三

六

樽前醉落花

題小畫

溪友敲門留白魚浣花翁舍酒應無急呼阿段衝寒雪黃四
娘家得得沽

短述

蠶拵花鬢忙釀蜜螳銜翅亂隨衙幽人一笑輟吟事獨倚
闌干春日斜

春怨

酒痕和淚駮羅衣掌上纖腰瘦一圍燕子不來猶卧病半簾
紅雨送春歸

明詩紀事

貴陽陳 田輯

丙籤

彭韶 一首

韶字鳳儀莆田人天順丁丑進士授刑部主事歷員外郎中出為四川按察副使遷按察使再遷廣東布政使改貴州擢右副都御史巡撫應天改順天永平召為刑部侍郎尋兼僉都御史巡視浙江兼理鹽法改吏部進刑部尚書卒贈太子少保諡惠安有從吾

滯稿十二卷

四庫總目韶正色立朝巋然者舊其文雖沿臺閣之體而醇深雅正具有根抵不同於神瘡而貌腴

丙籤卷四

今言方遜志在翰林寵任時薦西楊西楊修實錄乃誘方叩頭乞餘生彭惠安公哀江南詞敘述建文死義之臣至方遜志乃云後來奸佞巧言自粉飾叩頭乞餘生無乃非直筆蓋指西楊輩修實錄書方再三叩頭乞生者非實事也

魏孔淵太守送岑嘉州集書數韻復之

岑嘉州真名流生平浩氣橫清秋詞源瀕洞傾枚鄒春江曉漲蛟龍浮從班解秩不復收從軍直到海西頭胡沙三載踏驂騶長安萬里空悠悠閒關西赴五馬侯郎官御史青幕遊蜀嘉山水增清幽夜夜文光煥斗牛嘉州嘉州知不憂遺文淪落人重修當時炙手勢莫傳至今寧有姓名留

王克復 一首

克復字師仁福清人天順丁丑進士授刑部主事歷

員外郎中出爲江西參政歷湖廣按察使江西布政使擢右副都御史巡撫應天遷南吏部侍郎

吳門懷古

昔日館娃處繁華空故邱楓橋霜落夜茂苑月明秋響屨青苔沒香涇錦纜收傷心歌舞地一任麋鹿遊

周謨一首

謨字守謨新淦人天順丁丑進士累官陝西按察副使有東臬集

寓舍舒懷

春風浩蕩捲晴沙幾日行人未到家料得東臬桃李樹已應開到二分花

丙籤卷四

左贊二首

贊字時翊南城人天順丁丑進士授吏部主事歷員外郎中出爲浙江參政遷廣東布政使有桂坡集

書史會要左贊書法兼諸體尤精於隸得二蔡筆意

遊從姑山

勝境重來又十年山中風景故依然危崖俯瞰雙江水石竇微開一綫天夾道松筠森晚翠隔城樓閣倚晴煙白鷗波外浮雲淨目送飛帆到日邊

徐貫一首

貫字原一瀉安人天順丁丑進士授兵部主事歷員外郎中出爲福建參政遷布政使改山東擢副都御

史巡撫遼東召爲工部侍郎進尙書加太子太保卒
贈太保諡康懿有餘力稿

蘇嶺驛別張序班

驛路相逢又相別客邊送客若爲情東風也解離人意故遣

飛花繞旆旌

虞勳一首

勳字舜臣海鹽人天順己卯舉人

登鷹阿頂贈松崖道人

道人結屋懸崖巔蒼松百尺蟠屋前凌空怪石根半露巢鶴

老樹藤相纏層巒醉踏苔雲滑洞門長嘯蘿月圓借君九節

碧玉杖同探崑崙十二天

丙籤卷四 三

王佐一首

佐字廷用福州中衛人天順己卯舉人授桐廬訓導

改鄒平教諭有三留稿

靜志居詩話廷用宮怨詩芙蓉帳冷減容光愁倚熏

籠嬾著牀寒氣逼人眠不得鐘聲催月下迴廊曹能

始十二代詩采之游用之夢焦詩話謂南甯伯毛舜

臣留守南都灑掃舊內見別院牆壁多舊宮人題詠

年久剝落不可辨識其一署曰媚蘭仙子書卽此詩

末二句也當出好事者傳會不然裕陵定都北京之

後康陵未南巡以前安有宮人以廷用詩書之南內壁乎

上清宮留飲

羽僊邀我飲流霞不覺松梢日已斜鶴背洞簫歸路晚一聲
吹落碧桃花

張濬一首

潛字哲之閩人天順己卯舉人授饒平知縣有孝友
堂遺稿

宮詞

金箔微開埽玉牀離宮初度水風涼月華滿地笙歌沸未信
今宵更漏長

張元禎一首

元禎字廷祥南昌人天順庚辰進士選庶吉士授編
修進左贊善擢南侍講學士進學士遷南太常卿兼
學士掌詹事府事擢吏部侍郎入東閣典誥敕天啟
初追諡文裕有東白先生集二十四卷

漫興

丙籤卷四

四

吾聞唐虞時明目達四聰如何後來世自作瞶與矇致令天
下情默默不能通撫卷三嘆息颯颯來天風

陳煒一首

煒字文耀閩人叔剛子天順庚辰進士授監察御史
遷江西按察副使進布政使有恥菴集十卷

宿茅山觀

息影茅山陽林昏月初上樹古虬影蟠風迴葉聲響客夢不
成憩孤懷共誰賞緬惟故山雲無由謝塵想

黃孔昭一首

孔昭初名曜以字行改字世顯黃巖人天順庚辰進
士授工部主事進員外郎改吏部進郎中擢右通政

遷南工部侍郎嘉靖中贈禮部尚書諡文毅有定軒

集

田按文毅官吏部最有名嘗與謝鳴治輯台人詩爲
赤城集六卷許廷慎李長民諸人詩皆賴以傳

遊山寺

山隱招提境人穿松柏林鐘聲出樹遠塔影到池深掃葉分
僧石聽猿坐竹陰禪關秋草滿索寞向誰吟

陳選

一首

選字士賢臨海人天順庚辰進士授監察御史擢河
南按察使進廣東布政使

雨阻

篷響聞雨至淒然生旅愁遙尋晚林磬暫駐寒塘舟窗下一

丙籤卷四

五

僧老林間曲徑幽誰言阻行者翻使得佳遊

祁順

二首

順字致和東莞人天順庚辰進士授兵部主事遷戶

部郎中出爲江西參政謫石阡知府遷山西參政進

江西布政使有巽川集十六卷

田按致和守石阡撰石阡志十卷以才敏稱文守嘗
遊鎮遠西峽山與興隆周布政瑛倡和布政有句云
忽聞黃太使詩句落黔
中其爲黔人傾慕如此

登臨江清風樓

晚涼公事暇乘興一登樓雲氣千山雨松聲萬壑秋隄平芳
草合天遠大江浮日暮行人少空橫野渡舟

野塘秋景

翡翠鴛鴦各有情映波毛羽最分明玉樓金殿何須問且了閒塘一段清

鄭紀一首

紀字廷綱仙游人天順庚辰進士改庶吉士授檢討
歷國子祭酒南左通政太常卿戶部侍郎進本部尙
書致仕有東園文集十四卷詩集十二卷

遊鳴峯巖

清絕梅峯下溪南第一山客尋流水到僧伴白雲問松子撲
琴響藤花點硯斑雖居淨世上卻自異人間

彭教一首

教字敷五吉水人天順甲申第一人及第授修撰進

丙籤卷四

六

侍講有東瀧遺稿四卷

麓堂詩話曩時諸翰林齋居閉戶作詩有僮僕窺之
見面目皆作青色彭敷五以青字韻嘲之幾致反目
子爲解之有曰擬向麻池爭白
戰瘦來雞骨豈勝拳聞者皆笑

月印龍潭

一月在天心影落寒潭底閒撫曲闌干問龍何日起

陸鈇三首

鈇字鼎儀崑山人榜姓吳天順甲申第二人及第授
編修歷修撰右春坊右諭德擢太常少卿兼侍讀有

春雨堂稿三十卷

懷麓堂集鼎儀詩調高古盡去濃豔當所得意縱筆
揮灑刻意極力者顧追之而不可及尤嗜書清勁可
愛
麓堂詩話張滄洲亨父陸靜逸鼎儀少同筆硯未第

時皆有詩名亨父天才敏絕而好為精鍊奇思硬語
間見疊出人莫撰其鋒鼎儀稍後作而意識超詣凌
高徑趨擺落塵俗筆力所至有不可形容之妙雖或
矯枉過正弗恤也二人者若天假之年其所成就不
知到古人何等地步而皆不壽以死豈不重可惜哉
詩談陸欽九霄之禽翩然高舉莫測其意向
藝苑危言陸鼎儀如吃人作雅語多在咽喉間
田按陸鼎儀張亨父詩均為茶陵所稱許鼎儀有清
裁而力弱不能自舉

戲簡文量

樽前誰遣雪兒歌司馬風情晚更多銀蠟影偏人已醉紫檀

聲斷興如何歸來尙想桓伊笛醒後空慚學士波戲問韋娘

今健否青樓元自不會過十月二十八日子與文量晚酌朱

蕩夜深風冽琵琶屢斷而懋暹以洞簫繼之已而秀舍絃按

拍清歌數曲中有所謂學士波者余不解文量哂之曰此方

言也文量醉甚戲問秀士韋娘安否秀茫然無以對因相與撫掌而罷云

次韻答亨甫

丙籤卷四

七

水繞城圍二萬家市門潮落露寒沙橋憐白塔吟風葉路憶

新隄卧雨花自媿兒童辭邑里每因朋舊惜年華他時歸卧

吳江上應借滄洲十頃霞白塔亨甫屋邊橋新隄余家河也

瓊林醉歸圖

金羈細馬出明光碧色羅衣錦繡香行過玉河三百騎少年

爭說李東陽

田按天順七年癸未二月會試棘闈火八月再試取

吳鉞等二百四十七人至甲申乃舉廷試東陽二甲

張泰

泰字亨父太倉人天順甲申進士選庶吉士授檢討

遷修撰有滄洲集十二卷

升菴集張亨父詩句清拔名於一時其正月十六日詩云長安元夕少燈光此夜歡娛覺更忙十里東風吹翠袖九門銀燭照紅粧虹橋御陌爭春步雲閣誰家閣晚香醉着吟鞭急歸去老夫當避少年狂其手書稿慎於先師李文正公處見之南濠詩話張修撰亨父工於詩嘗歲晚與翰林諸公聯句有云生事殘年話風流後輩誇竟以是月卒亦詩識也

田按亨父才華爛漫與陸鼎儀陸文量號吳中三鳳館選時劉文安為院長語某吉士云古詩律詩各有體裁與亨父叫其妙可也其為老輩推重若此

用韻答陳克敬杏花下作

春來幾花開過春幾人復為花主人臨風問花花不語一片
已墮青溪蘋我有春詞為花發韶華瞥眼春江雪花時不抱
花影眠孤負青天送明月

丙籤卷四

八

贈別蔡時中温州佐府

南客之官去浙東永嘉山水儘相容城當斗口雲生壘寺落
江心浪打鐘松院一琴同吏隱花時五馬勸春農未應別駕
淹高足漢署人多識蔡邕

為鎮江唐一敬題一泓亭

江郭喧喧此室幽當階一水淨涵秋晴看細浪搖花幔夜吸
寒星落茗甌未惜草書供渴兔最愁橫吹起潛蚪題詩為問
唐清叟還許濠梁作勝遊

長門春思

露重花垂泣煙深柳暗顰如何清禁裏有此斷腸春

京中咏春

輦路輕塵撲馬鞍酒房花市繡成團一家樓榭東風裏多少
春愁隔畫欄

海城春望

一帶浮光界遠田數枝花柳簇春煙誰家酒幔招人醉搖蕩
東風出樹巔

題畫

遠山隔樹高於隴墜石當溪響亂泉欲脫塵衣此中去滿庭
黃葉抱秋眠

二陸來酌聞隣家絃索聲

酒淺燈寒醉不成隔牆絃語若爲情太平兒女中原樂不是
蛾眉出塞聲

謝鐸四首

丙籤卷四

九

鐸字鳴治太平人天順甲申進士選庶吉士授編修
歷侍講南國子祭酒擢禮部侍郎卒贈禮部尙書諡

文肅有桃溪淨稿八十四卷

麓堂詩話謝方石出自東南人始未之知爲庶吉士
時見其送人兄弟詩曰坐來風雨不知夜夢入池塘
都是春爭傳賞之學詩自立程課限一月爲一體如
此月讀古詩則凡翰林官課及應答諸作皆古詩故
其所就沈著堅定非口耳所到既其老也每出一詩
必令子指疵不指不及子有所贊亦傾心應之必
使盡力子嘗爲匡山詩中一聯渠意不滿子以爲更
無可易渠笑曰觀子胸中似不止此最後曰廟堂遺
恨和戎策宗社深恩養士年渠又笑曰微我子不到
此子又爲端禮門古樂府渠以爲未盡往復再
四最後乃曰碑可毀亦可建蓋棺事久乃見不見姦
黨碑但見姦臣傳渠不待辭畢已躍然而起矣方石
古樂府最得古意如過河怨日過河過河不遇河奈
此中原何夜半檄曰國威重空頭敕相權輕夜半檄

皆警句也
詩談天台謝鐸剛毅英華焉用藻飾
姜南蓉塘紀聞桃溪謝英華翁鐸有順天鄉試錄欠
韻寄潘時用詩云又是西風桂子秋不聞仙錄上瀛
洲青燈入夜西涯老誰復朱衣為黜頭未注云時西
涯李學士為考官而時用不第豈非命哉蓋時用與
三台詩錄文肅既歸路過新河有軍笑之官有官不
會做有錢不會接文肅聞之笑曰軍其知我哉遂賦
一絕云五陵裘馬日更新白髮歸來苦愛貧除卻新
河軍識我平生知己更何人亦前輩一段佳話也

白楓河

白楓河河水滿地流紅波波聲入海爭盪摩蛟螭夜泣愁龍
鼉嗚呼壯士可奈何白骨兩岸高峩峩君不見河之水深不
極至今中有銜冤石

三台詩錄元季方氏之亂陳仲廣率族人禦戰白楓河不勝憂憤而卒世無知者公特表章之

丙籤卷四

病起

病起風光四月過蕭蕭雙鬢不知幡驚心午飯還宜粥入眼
春衫盡換羅筋力轉妨騎馬怯路岐生見出門多百年夢覺
今如此一笑青山奈爾何

麓堂詩話陸鼎儀嘗言謝方石詩好用夢字及一笑字察之果然閒以語之亦一笑而已不易因憶張亨父嘗言杜詩好用真字豈所謂許渾千首溼杜甫一生愁者雖古人亦不能免耶

謁侯城里有感

欲向西風醉一尊乾坤何處著英魂百年事過風前燭千古
名留海上村香火半龕誰地主孫枝一葉是君恩夕陽滿地
傷心淚付與江流自吐吞

孝女湖

丁甯湖上人莫汲湖上水中有孝女淚下徹重泉底

倪岳 一首

岳字舜咨錢塘人徙上元尚書謙子天順甲申進士

選庶吉士授編修歷侍讀遷學士拜禮部侍郎進本

部尚書加太子少保歷南吏部兵部入掌吏部卒贈

太保諡文毅有清溪漫稿二十四卷

田按文毅父謙諡文僖有明父子得諡文自倪氏始
文毅詩才不逮文僖而政績遠過之

晚泊流河

迢迢客路近流河漁浦風晴起棹歌夾道短籬村巷小兩行

疏柳夕陽多

劉大夏 二首

丙籤卷四

七

大夏字時雍華容人天順甲申進士選庶吉士改兵

部主事歷員外郎中以忤閹繫獄尋出為福建參政

進廣東布政使改浙江擢副都御史治張秋河進戶

部侍郎兼左僉都御史理宣府兵餉移疾歸起右都

御史總制兩廣軍務拜兵部尚書加太子太保賜歸

以忤劉瑾逮繫遣戍肅州赦歸卒贈太保諡忠宣有

東山集

何孟春燕泉集劉東山公晚年肅州之謫雖由逆瑾
其實公同年焦閣老芳為之公與焦素無他焦特忌

公名耳岑猛賂既行瑾集大臣議欲寘公重辟諸大
臣憚不敢吐一語獨都御史屠公鏞曰劉某何罪必

欲文致之瑾怒明日大臣以屠議奏瑾謀於焦及吏
部尚書劉宇宇又素嫉公者署劉某輕義夷人遷徙

發遠戍瑾初擬廣西邊衛焦曰是送彼歸也乃定鄉
州公西行稿載公赴肅州時故舊皆避不來會獨劉

人嚴仲洪贈詩公和答之公過六盤山寄西涯閣老
詩末句云寄語同年老知已天涯孤客幾時還歎同
年也後歸自六盤和前韻末句云憑誰寄語中州子
前度劉郎今已還中州子焦與劉也其事蓋如此
雙齋詩話劉忠宣公平生不刻意作詩間有爲而作
者皆事核意真情到興具如撫諭田州句云如何萬
頃桑麻地天與夸人作戰塲雖土官岑溥亦感也出
錦衣獄中有句云紅塵未了清時債白髮重來此也
遊蓋公爲兵部郎中嘗下獄也謫戍甘肅過六盤山
句云綠野誤爲三品地白頭今到六盤山蓋以爲終
於侍郎不起未必有此謫也孫蓋所示子姪句云報國
未能平海宇充軍終是累兒孫蓋以逆夢急趨黃屋
遠充軍之批旨也又云猶有先朝宣召夢急趨黃屋
面承恩蓋思孝廟君臣相遇于載一時雖在謫所不
忘情也謫所贖同事詩曰時事何人苦變更邊城持
戟半儒生蓋劉瑾用事士大夫有罪多謫謫甘肅也
田按忠宣一代名臣詩
非所留意語特軒爽

再登重陽菴

山徑迂迴又一菴白雲深處暫停驂遊人對景心偏適遠客

丙籤卷四

三

懷鄉意豈堪十載官情淹薊北半生歸夢在江南孤臣敢負
君恩重深恐經綸未素諸

和同遊陸大參韻

雲山何處是歸期老去偏憐宦况微作客未離煙水地行囊
先製芰荷衣吳山地近紅塵少楚澤尊香紫蟹肥今日共君
須盡醉白頭相與會應稀

陳音一首

音字師召莆田人天順甲申進士選庶吉士授編修
歷侍講遷太常少卿進本寺卿有媿齋集

田按師召與顧東江居相鄰近於牆上作綸竿以便
投詩名曰詩釣東江有詩紀之云巧心文思孰兼長
詩釣詩成又幾章千里浮沈謝江路一竿風月共鄰
牆君如綠木求筋鯉我正懷磚想珮璜畢竟兩無名

利念五湖煙
水舊同鄉

送潘粟夫

二十年前舊弟兄
離亭尊酒不勝情
蜀山渺渺知何許
清夜相思只月明

吳希賢 三首

希賢字汝賢莆田人天順甲申進士選庶吉士授檢討
歷修撰左諭德遷南侍讀學士有聽雨亭稿

送上人還莆

十載關河雲水蹤
忽驚春雨偃巖松
傳來西竺千年法
歸聽南峯五夜鐘
錫響吳山驚虎豹
杯浮閩海護魚龍
題詩我憶曾遊處
落日曇花意萬重

丙籤卷四

三

倪元鎮畫

春草湖邊浪拍航
篷窗日午坐焚香
此翁老去雲林在
枯樹荒亭幾夕陽

咏梅送熊通政

江南春色別來久
夢繞梅花思不禁
何似拂衣歸去好
小齋明月夜橫琴

郭璽 一首

璽字文瑞城武人天順甲申進士選庶吉士改兵部

主事

送王惠民

故鄉憐久別
奉詔喜南還
草色都門道
潮聲潞渚船
清風隨

去鶴明月滿前川
佇看來春暮
鵬搏萬里天

倪輔一首

輔字良弼平湖人
天順甲申進士授吏部主事改禮部
歷官湖廣參政有類劇遺稿

徐州

山中雲散千年氣
隄上人耕百戰場
瘦馬獨行回首處
冷煙斜日似咸陽

沈榮一首

榮字元節平湖人
天順甲申進士授工部主事歷潮州
延平臨江知府遷貴州參政有頤貞集

樵李詩繫元節詩文冲澹
純雅五言古得柴桑風氣

丙籤卷四

古

送友歸省

江天雨繁霜水落見層石
北風捲地來寒色
晚逾劇之子戒行李
詰朝問鄉國青雲多故知
而深此離情我懷亦何爲
兀殊未釋一官慚素餐
十年久爲客甘旨願已違
雙親況垂白家弟昨致書
海潮害秋穫因之欲奮飛
安得晨風翼

林榮一首

榮字孟仁番禺人
天順甲申進士授監察御史遷福建
按察副使

薊門聞笛

冒寒重到塞垣遊
羌笛悠悠起戍樓
應有開元遺譜在
月中三弄小梁州

官廉一首

廉字汝清平度人天順甲申進士官戶部郎中有薊
東集

和戈主事勉學韻

相逢歧路際話別酒尊間遠樹迷前浦停雲繞暮山離襟連
日苦塵鞅幾時閒回首蒼龍闕隨君有夢還

桑悅 三首

悅字民懌嘗熟人成化乙酉舉人除泰和訓導遷長

沙通判改柳州有思玄集十六卷

田按民懌跋唐詩品集云唐人詩三百餘篇大抵賦
多而比興少句多而意少其傑出者陳子昂李太白
杜子美韓昌黎四家耳併唐三百餘家之意不如陳
李杜韓四家併陳李杜韓之意又不如阮籍咏懷詩

丙籤卷四

五

漢古詩數十首可謂知要第其所作利鈍雜陳妄自
矜詡宜為前人詆訶其訓導泰和也李文正贈詩云
十年三度試春闈親見聲華滿帝畿甲第久慚唐李
邵奇才終誤宋劉幾功名歲晚非蓬鬢湖海官貧尙
布衣試看孤鷹下林落壯心還向碧天飛憐才之意
溢於言外

八月二十二日過分宜昌山洪見一巨蛇長二丈餘雙

角嶄然眾夫驚呼潛其首尾脊角獨露冉冉而逝作

詩志異

扁舟晚亂目山洪巨蛇雙角疑潛龍隨流徐入巖穴中薄雲

慘慘吹陰風季秋陽蟄龍德窮非時小見蜥蜴同投荒偶覩

真奇逢天意示此非夢夢震澤秋水涵虛空先生盍歸採芡

蓉醉弄支壘誅長虹

贈蕭時清

十里螺湖如掌平開門正挹滄浪清偶逢道士贈丹訣閒課
山童鈔酒經晝長燕子飛入戶春盡樹陰鋪滿庭近來聞說
有奇事賣藥修琴曾到城

過陳巨濟國賓家

醉眼昏昏醉墨斜題詩閒過晉卿家朱簾十二無人捲風定
園林自落花

文洪一首

洪字功大長洲人成化乙酉舉人官涑水教諭有括
囊稿二卷

田按涑水以名德重不以詩見長自敘其詩云如春
山早鶯初出深谷舌弱語澁不能成聲古人之不自
矜詞如此

丙籤卷四

夫

菊存坡

杪秋風氣肅繁霜被原野采采黃金花盈盈尙堪把會心卽
欣然何必東籬下

明詩紀事

貴陽陳 田輯

丙籤

羅倫一首

倫字彝正永豐人成化丙戌第一人及第授修撰坐

論事貶泉州府舶提舉起南大理評事就遷修撰正

德中贈諭德諡文毅有一峯集十卷

四庫總目倫文剛毅之氣形於楮墨詩亦磊砢不凡

施閏章雙齋詩話世傳羅一峯起用時哭友詩有九

原峯遇南陽李為報羅生已復官子疑其忿狹不類

一峯偶問施偉長則御史薛之綱輒廬陵陳莊靜者

也其詩云學士先生早蓋官莊歌聲裏路人歡填門

客散名猶在附郭田多死亦安鹽井已非今日利冰

山不似舊時寒九原若遇南陽李為報羅生已復官

蓋陳不協鄉評又嘗與李同齋蔽羅公者也

丙籤卷五

田按彝正論提舉後起南大理評事見菽園雜記可據以補史缺

林緝熙歸會於薊城梁宅和洪城見寄

雲水千峯更萬峯此心期與故人同蒼茫世路浮生在澹泊

春杯野興濃鄉夢幾回茆店月蓑衣無恙柳花風明年喚取

陳公甫卓帽青天信一篷

程敏政 三十二首

敏政字克勤休甯人成化丙戌第二人及第授編修

歷左諭德少詹事兼侍讀學士以事罷官尋起復改

太常卿仍兼侍讀學士進詹事再進吏部侍郎贈尚

書有篁墩集九十三卷

殿閣詞林記孝宗時尤重經筵學士程敏政記其事云弘治元年三月十二日初開筵賜宴及白金寶

鑑十三日文華後殿早進讀尚書孟子及午進讀大學衍義以爲常講畢賜茶杏李蓮房鮮筍青梅枇杷二十八日以後屢賜桃杏李蓮房鮮筍青梅枇杷楊梅雪梨鮮藕敏政等具表稱謝且記之以詩有日黃封盡帶乾清字朱實平分上苑香七月二十日文華殿後講上顧中官賜講臣冠帶鞞袍敏政預賜織金雲雁緋袍一副金帶一及烏紗帽卓鞞面謝訖上顧謂曰先生辛苦成對曰此皆職分當爲頓首而退有詩紀之云日映眾恩曉殿清湛恩稠疊駕親臨衰衣紅濯天機錦束帶黃分內帑金久幸清班容宦履漸漸華髮點朝簪經生職分尋常事消得君王念苦辛

查慎行人海記劉文靖以程篁墩短其不能詩銜之釀成廷鞞之獄李文達之賺葉文莊亦以疵其詩文之故二公賢相也其器量狹小乃爾

丙籤卷五

十一月偶至南山黃落頗甚夜宿聞雨作

清溪淺可涉朔氣動原野數日與山別殘菊不盈把多病恆鮮歡新筍謝杯竿夜寒夢屢續涼雨忽鳴瓦俯仰天地中流光疾於馬紛紛歲將晏稍幸世緣寡上想雲谷仙幽懷浩難瀉

謁京口魏勝將軍廟

長風吹山磯落日下京口桓桓魏將軍廟食此邦久土馬贖儀衛金書炫庭牖忠義夙所欽再拜酌江酒憶當宋社南君臣竄身走將軍起田間意氣最雄赳孤城江海上日日事攻守中原天弗界竟爾墮戎醜前旌曉不揚雄劍夜空吼何人始召亂志士徒殞首當時百戰場荒落見沙柳

過鄭公釣臺

余忠宣公
隸字刻石

相公湖邊一拳石截斷湖光三百尺射蛟人去今幾年誰掃
雲根看遺蹟師山先生性愛山偶然得此青屨顏臨流坐釣
不知晚漁樵並載扁舟還武威余公天下士特與先生題篆
字良工刻入斷崖傍遂使溪山增勝事一朝海內風塵生兩
公死國如弟兄平生隱顯雖異迹竹帛同垂千載名薰風雨
過潮初落足躡蒼苔俯幽壑釣絲已逐野煙飛字畫多爲古
藤絡師山之節峻且孤武威之字人爭摹忠賢遺蹟衆所寶
泉石清奇何處無

蘇墨亭

百步洪有東坡石刻云郡守蘇軾山人張天驥詩僧

丙籤卷五

三

道潛月中遊十六字沒水中三百年矣水部主事尹
君廷用得而昇之作亭以覆曰蘇墨亭予凡七過其
下不能措一詞成化丙午秋歸自南畿念終不可已
乃勉成數語留亭中且以寄尹君時子族姪孫楚英
方同知徐州并書以贈之

蘇墨亭前七回過春水茫茫懶收舵公輪門下難爲工縱有
新詩不成和高秋水落百步洪登亭如見蘇長公大書深刻
十六字橫姿逸態生長風黃樓東來水如注野僧山人舊知
遇石瀨潺湲月滿天彷彿當時舊遊處題名一去不復還風
雨剝落莓苔斑水神淵客那敢闕至寶有時歸人間行河郎
官訪遺蹟摩挲愛此羊公石百夫昇出泥沙中搨本相傳驚

再得風流太守惠政多
築隄兩岸高巖峩由來物與人俱重
墨妙紛紛知奈何

題吳廷端太守山水障

蒼山突起浮雲中
湖光百頃磨青銅
底須飽看卧遊錄
入眼已覺紅塵空
何人卜築依山住
一任飛雲挂庭樹
下瞰澄江作小亭
正據溪山最佳處
柴扉晝掩呼未開
石牆夜雨生莓苔
門前有人問奇字
短擢日攜春酒來
對岸溪橋大於堯
寒潮漸嚙沙頭逕
農家地僻少通車
僧舍樓高屢聞磬
村春有粟爨有薪
忘機魚鳥相情親
山林豈博鐘鼎貴
優遊最愛漁樵人
竹鶴老翁今已矣
半副生綃映窗几
風致公然似欽西
歸興蕭蕭隔千里
練水屏山今所無
故鄉之樂不可孤
相期歲晚結新社
飽玩天開眞畫圖

丙籤卷五

四

宋理宗賜福王與芮雪景爲鄭村汪宗裕題

瑤峯玉樹瑪瑙坡
寶祐墨本來宣和
天山氈乳紇千雀
此景此意將何如
御筆中題福王字
生綃上遣龍圖志
鳳山日永萬幾輕
廊廟幾人同受賜
天人想像冰雪顏
好文亦自非等閑
詔書屢表濂洛緒
詞翰却在陳隋間
三百年來驚物換
散落塵寰充一玩
摩挲爲賦懷古篇
安得虹光射霄漢

贈劉太古

瀟灑劉太古絕似鮑參軍
老去詩還健情多酒未醺
疏髯亂雪長嘯邊行雲
何日開春社巖花約共分

松蘿山

雙峽中分一徑通寶坊遙隔片雲東四時山色涵空翠萬折
泉聲瀉斷虹清愛竹孫穿凍雪靜聞松子落香風登高兩屐
吾方健攜手無因得贊公

李員外應禎吳太守原博約遊虎邱

日散林霏見虎邱故人清約此閒遊望深綠樹知藏寺吟徧
青山始繫舟塔院風來花似雪劍池春到水如油酒闌不盡
吳中勝老衲相招更倚樓

揚州

江日輝輝下廣陵客邊吟興偶然增宋軍水砦多編戶隋帝
離宮半屬僧鵝鴨似便春雨數樓臺爭出暮雲層往來總戴
承平福莫問從前幾廢興

丙籤卷五

五

病中齋居兼謝西涯學士見過

倚榻蕭然不出門坐聽宮漏幾黃昏暑留巾襪齋心慣病卻
茶瓜藥禁存竹簡有情時共閱楸枰無偶但空捫故人秉燭
能相訪踏破閑階碧繡痕

次韻原博論德

抱病經旬未入朝齋居秋思轉寥寥坐憐白日繩難繫起望
青山手可招夢繞川原疑脫騎瘦便風露愛聞蛸詩壇故事
誰先續倚席長慚郢上謠

劉諫議祠

老樹陰森護廟門尙疑生氣塞乾坤衣冠死愧千言策俎豆
公宜百世尊晏歲牛羊山下塚東風桑梓道旁村匡時不盡

平生恨白日悠悠逝水奔

送辨如海上人遊松江

霜鴻將盡一帆開，遠別難勝老辯才。
郢客未分新社約，吳僧先掃舊經臺。
枯腸臘供芟畦菜，白足春遊了徑苔。
聞說木蘭花未老，晚香盈握待師來。

客請遊望湖亭修碧軒不及往次韻

西望湖天半日程，擬擲寒綠洗塵纓。
一灣路隔紅塵遠，五月涼生白芷輕。
山寺茶煙衝鶴起，石門空翠逼人清。
春來遙憶憑闌處，萬頃鷗波夕照明。

送陸文量武選赴浙江參政

同榜悠悠感歲華，晨星落落散天涯。
除書又拔吳中俊，處世

丙籤卷五

六

眞如海上槎，內史之官先過里。
宣公封事久名家，南歸欲訪巢居閣。
肯檄林僧一供茶。

廣陵驛下與表兄林文秀倉使夜酌

二十四橋春草平，月明依舊滿蕪城。
繁華百代底須問，邂逅一樽無限情。
去國浪傳金馬客，倚樓誰送玉簫聲。
孤帆又作江南別，坐聽船籤報五更。

楊村道中

幾處吹煙認水村，數聲山犬吠籬門。
寒天日落明鴉背，荒歲田空剩草根。
垂澗石如牛馬飲，排雲山似節旄屯。
眼中無限詩情在，欲對沙鷗了一尊。

吊梅宛陵

詩墨猶傳草木馨，煙雲長鎖舊池亭。
魂遊宛下空秋月，客散河陽幾曙星。
崑體戰降孤幟赤，都官名重一衫青。
晚生欲附宣州派，慚愧牛轅逐鳳軒。

松崖爲縣人胡昭題

老髯踞石幽，且貞喜君卜居若平生。
三更滿地星月碎，九夏半空風雨生。
知心晏歲竹連鵑，過眼一春花滿城。
斷苔有約幸無拒杖策，來尋猿鶴盟。

和答吉安顧天錫太守同年

籬菊新黃百草枯，天涯相憶共朝餼。
一緘秀句題鈴閣，千里虹光射鏡湖。
致主有才淹老守，全身無策笑庸夫。
喜聞述職行將近，幾日風帆過直沽。

丙籤卷五

七

留別濟甯周同守

憶在成都視席同，天涯相望幾秋鴻。
君生向我五年長，行色困人三月中。
宦海積薪隨下上，客途飄梗定西東。
艤舟不盡牽情處，太白樓前柳絮風。

送釋方策住善權寺

上刹新開住，辯才一舟南去水如苔。
再傳衣鉢詩宗遠，終日溪山畫障開。
草沒仙人燒藥竈，花明丞相讀書臺。
病夫久欲捐暈飲，春焙還能數寄來。

早過車田村

沙岸深穿石徑幽，橘梢藤刺翠相繆。
孤村路出荒垣近，十畝陰蟠古木稠。
樵行半灣松崦腳，水榭遙響竹棚頭。
息肩少狎

羣鷗坐不覺涼生兩袖秋

弘治辛亥歲仲冬念五日在萬山觀作

城頭霧斂青天開平地忽見雙蓬萊捲簾下瞰白雲起拂手
近招黃鶴同一龍擎石樹根古萬弩射潮風壑哀鍊師縱爾
能謝客容我到城須一來

青巖題雜畫

青山寂無人空波澹流水垂楊不勝春搖搖蘸清泚

留雲亭

亭子臨孤絕江雲礙不飛時來簷下宿水氣濕僧衣

山水小畫爲張尙相題

山色青於染松陰掃未開水邊芳草地才見兩人來

丙籤卷五

八

與謝子期閒步至北山莊作

與客尋源過石梁水車遙認北山莊鷗邊一陣東風起吹落
桐花滿澗香

會昌雪亭公子許雨中移竹詩以訊之

八尺庭除半綠苔一春無意買花栽幾時憑仗連朝雨分得
青鸞數尾來

送戶部葉叔通郎中知甯國府

宛陵祠下竹娟娟一榻曾分聽夜泉攜酒寓公誰復在六回
春色到吟邊

沈石田小景

雨晴山麓上葺蒼老木亭前卷畫開城市愛閒應更少水邊

才見一人來

黃仲昭一首

仲昭名潛以字行莆田人成化丙戌進士改庶吉士授編修坐諫鰲山煙火予杖謫湘潭知縣遷南大理評事進寺副乞休弘治初起江西提學僉事尋致仕有未軒集十四卷

升菴文集宋時御前內宴翰林撰致語入簡撰帖子雖歐蘇曾王司馬范鎮皆為之蓋張而不弛文武不能百日之蜡一日之澤聖人亦不之非也成化中黃編修仲昭莊檢討景不撰內外隔絕每有文字別開去以此得名然自是而後內官至蠹政害人曷若門有文華門仁智殿輩每得美官至蠹政害人曷若仍舊之愈乎愚謂於麗語中寓規諫意如六一公玉釐經年不遊幸上林花好莫爭開君王念舊憐遺族長使無權保厥家亦何不可

丙籤卷五

九

進奉仲昭與編修章懋檢討莊景諫張燈豈夷舜之道詩詞豈仁義之言乞將煙火停止帝以元夕張燈祖宗故事仲昭等妄言並杖之闕下左遷其官時修撰羅倫先以言事被黜人稱翰林四諫檢程克勤篳墩集有元夕觀燈應制詩云五朝故事傳來久樂與民同上元酒想像先皇得眾心尙有燈張播人口太平喜是百載過邊燧不驚天氣和古來張弛皆有道賞心一日非為多未免近於迎合上旨矣

送人還莆

兩京飄泊幾星霜卻喜逢君話故鄉潮水不知離別苦又從江上逆歸航

章懋一首

懋字德懋蘭谿人成化丙戌進士改庶吉士授編修坐諫鰲山煙火謫臨武知縣改南大理評事進福建僉事致仕起南國子祭酒再乞休復起南太常卿南

禮部侍郎皆不就卽家進南禮部尙書卒贈太子少

保謚文懿有楓山集四卷

劉永澄 郟中雜記章德懋庶吉士時閣老劉定之爲
教習一日以玉堂蔬圃詩試諸士德懋結語曰秋賞
月儀休拔御園中茶劉以樞悲愁羈患貧窮孤寡者
見月則不樂惟高官厚祿身享太平之日者見月則
樂也劉愈怒之後章以詠煙火詞得貶斥而劉遂不
救

靜志居詩話嘗見思陵御書一幅詩云未央鐘動曙
光生隱隱初聞柳外鶯風靜御爐香篆細日高斧坐
衮衣明螭頭陛擁黃麾仗豹尾班聯白玉珩最喜及
時勤庶政蒼蠅聲裏聽雞鳴眞迹存高上舍佑鉅處
觀者疑爲思陵御製實楓山集中詩也惟及時二字
集本作君王御筆更之是楓山一集曾歸乙夜之覽
矣附識於此以當開寶舊事
田按文懿以清望重一時不欲以文藻見長余檢其
集有禁中聞鶯詩云不隨舞袖歌金縷御伴仙韶奏
玉墀長信夢回欹枕處瑣闌吟
罷倚闌時未嘗不清麗可誦也

丙籤卷五

十

別閩南僚友

三年憲府同懷抱此日離亭惜解攜回首建溪溪上路春山
隨處鷓鴣嘯

張弼 十四首

弼字汝弼松江華亭人成化丙戌進士授兵部主事
歷員外出爲南安知府有東海集九卷

東海集成化壬寅九月旣望石齋先生白沙陳獻章
公甫應詔起而之京道過南安而太守東海居士風
亭張汝弼欲用曹參禮蓋公故事曰當不俟駕矣今
弄月臺上數月以受教非亟辦容與數日耳東海不
方度嶺又值積雨裝旆亟辦容與數日耳東海不
強石齋有詩曰玉枕山前逢使君西風吹破玉臺巾
巾乃石齋自製類華陽中直而無裝積者東海一
簾漸斷論議或有戾於其道而無裝積者東海一
絕激之曰白沙村裏玉臺巾不耐風吹易染塵莫笑
烏紗隨俗態宋廷章甫是何人石齋復以玉枕山詩

曰一枕橫秋碧玉新金齧閣上見嶙峋使君得此原
無用賣與江門枕睡人跋曰東海居士詠炎臺多悔
我大甚占玉柱峯嶙峋橫秋玉枕真無用自是乾
一雨新獨看天柱山亦南安之照山也故自依天柱以
坤不睡人天柱山亦南安之照山也故自依天柱以
玉枕與石齋順其意耳而又作二絕句云客囊羞澁
客衣單欲買南安玉枕山縱有枕頭那得睡雞聲催
入紫宸班寄語江門打睡人而今天地正芳春覺來
麓堂詩話張東海草書名一世詩亦清健有風致假
髻曲等篇皆為時所傳誦嘗自評其書不如詩詩不
如文又云大字勝小字子戲之曰英雄欺人每如此
不足信也

丙籤卷五

七

各處巡撫守令交章飛劾而科道併彈於是上大怒
斬臣首傳詣所歷地方令民心大快初臣至廣東南
安守華亭張東海目覩其驕橫作詩嘆曰過嶺囊箱
下瀨船丁夫日夜少安眠薄田蕩盡猶輸稅惡客時
來橫索錢窮髮東南皆赤子舉頭西北是青天不才
無計甦民困食祿乘軒自報然
武進縣志雲間張汝弼有盛名赴南安郡守道經毗
陵時陸詹事簡方得告南歸張訪之適展墓不見乃
索紙筆題一絕於陸世經堂有始知東閣先生貴不
放南安太守參之句陸歸急追之已行遠矣
震澤集張汝弼詩多警句往往為人傳誦其草書尤
多自得酒酣興發頃刻數十紙疾如風雨矯如龍蛇
欷如墮石瘦如枯藤狂書醉墨流落人間雖海外之
國皆購其蹟世以為顛張復出也
田按東海詩有豪氣不受
羈勒七言斷句尤推擅場

假髻曲

東家美人髮委地辛苦朝朝理高髻西家美人髮及肩買妝
假髻亦戕然金釵寶鈿圍朱翠眼底何人辨真偽天桃窗下

來春風假髻美人歸上公

雲間雜識張東海作假髻曲諷刺時貴當路衛之出守南安不得調而歸邵二泉作輓詩云張公不作南

養馬行

領馬易養馬難妻子凍餒俱尪孱若有芻豆且自殮安能養
馬望息蕃平原草盡風色寒羸馬散放聲嘶酸忽然倒地全
家哭便擬賠償茅屋茅屋無多賠不足更牽兒女街頭鬻
鄰翁走慰不須悲我家已鬻兩三兒

田按陸文量菽園雜記云國初馬養於各苑馬寺各監苑而已永樂中始以官茶易和林等處馬養之民間謂之茶馬正統十四年京師有警乃選取以備軍資養於順天府近京屬縣謂之寄養騎操馬及京師無事寄養之馬不復散去至今遂為故事每歲孳生賠補之法悉與各處茶馬無異養馬之家雖已量免

丙籤卷五

七

糧差而賠補受累者多其最害事者牧馬每歲不通淫而孕謂之飄沙新樂縣一家養此馬每三年賠二駒九年已賠六駒產已廢矣東海此詩可以相證陸清獻稱東海養馬行諸詩用意深遠與杜子美兵車行諸作相表裏有天下國家者所不可不知長非虛矣

夏仲昭畫行

君不見輞川王郎鐵鉤鎖漁陽塵飛竟摧墮君不見江南李
主金錯刀澄心堂紙同煙銷宋家寫竹文與蘇不求文字稱
士夫息齋板刻不足數房山尙書特奇古俱隨物改世見稀
我朝好手尙屬誰九龍山人王友石毫素爭先化工力當時
揮洒未足珍於今一紙千金值太常清卿得真傳風流瀟灑
與差肩宛如指活妙書法陽冰古勁張旭顛紫宸朝迴寫此
幅遠近縱橫萬枝玉鷓鴣吟雨下江泉猿猱號煙度巖曲湘

靈瑤瑟廿五絃淒淒切切如流泉長日相看竟忘寢箇中妙
趣難言宣乃知此老真奇絕飽弄清風與明月古來數輩皆
其儔興酣還陋芭蕉雪

東臯堂爲宜興王景昇賦

荆溪東下白雲鄉五斗先生舊草堂蔬圃幾弓連町疇稻田
百畝接陂塘魚兒浦口酒船小燕子風前茶焙香應笑東華
塵土客馬蹏終日爲誰忙

渡江

楊子江頭幾問津風波如舊客愁新西飛白日忙於我南去
青山冷笑人孤枕不勝鄉國夢敝裘猶帶帝京塵交遊落落
俱星散吟對沙鷗一愴神

丙籤卷五

志

董其昌畫禪室隨筆張東海題詩金山西飛白日忙
於我南去青山冷笑人有一名公見而物色之曰此
當爲海內名士東海在當時以氣節重其書學醉素
名動四夷自吳中書家後出聲價少減然行書尤佳
今見者少耳

和江源一韻

半醒半醉寫烏絲卻憶南安對酒時玉面阿童鸚鵡舞青山
小吏鷓鴣詩曲江池畔秋風早鐵漢樓頭落日遲聞道使君
重過此此情應與水同馳

棠溪景

白露宿寒塘寒塘浸明月懊惱少年心分明鏡中雪

觀泉

山巘高低如繡溪流屈曲無聲幽人閉戶不出門外小橋自

橫

題畫

石磴縈紆直又斜上方樓殿隔煙霞孤舟倚岸無人渡
嘯鳥聲中自落花

雨飲

花朝風雨阻清遊便躡棕鞋上小舟白髮周郎留共飲
大吳橋下酒如油

守南安柬招張直

五羊城裏半詩仙袂接神交三十年綠髮張生最年少
好來鈔我紫霞篇

琳湖

琳湖湖上草堂幽四面窗涵一鑑秋軒冕紅塵飛不到
竹牀

高枕對沙鷗

寄金陵王尚文

司諫王郎我舊知薛逢詩句李慈棋曾從虎口中間過
贏得歸來兩鬢絲

王中含蘊和所畫團扇

素紈團扇王郎畫竹石霜柯慘淡中謂是誰家舊時物
幾回

烈日幾涼風

中國古無摺扇嘗見王秋澗記元初東南夷使

者持聚頭扇當時譏笑之我朝永樂初始有特
僕隸下人所持以便事人耳及倭國充貢太宗徧賜羣臣內
府又做其制以供賜子天下迨徧用之而團扇廢矣今江南
惟婦人猶存其舊題團扇因著摺扇之緣起云

陸深春風堂隨筆今世所用摺疊扇亦名聚頭扇吾
鄉張東海先生以為貢於東夷永樂間始盛行於中

國子見南宋以來詩詞詠聚扇者頗多子收得楊妹
子所寫絹扇面摺痕尙存東坡謂高麗白松扇展之
廣尺餘合之止兩指許正今摺扇蓋自北宋已有之
倭人亦製爲泥金面烏竹骨充貢出自東夷果然
田按郎瑛七修類稿謂成化初高麗貢摺疊扇至朝
命做製以答復書格言以賜羣臣高江村天祿識餘
亦謂聚頭扇揮灑翰墨始於成化間予檢曾榮西墅
集有交趾削竹粘紙爲摺扇以充貢永樂乙未夏命
中書舍人寫傳格言於上以賜百官詩云捲霧舒霞
疊水紋中官擎出御前分溪藤蕭颯裁新樣汗竹參
當暑清肌骨願播仁風答聖君則揮灑翰墨不自成
始矣

賀欽一首

欽字克恭廣甯後屯衛人成化丙戌進士授戶科給
事中謝病歸弘治初以薦起陝西參議不赴有鬻閭

集九卷

丙籤卷五

五

田按鬻閭山人師事陳白沙才
筆不及白沙而賤履篤實過之

簡鄉人

攜壺欲就名園賞借問如今春淺深但得紅芳飛未盡便來
枝下聽鳴禽

林瀚一首

瀚字亨大閩人成化丙戌進士改庶吉士授編修歷
修撰諭德祭酒進禮部侍郎改吏部進南吏部尙書
改兵部以忤劉瑾謫浙江參政瑾誅復官贈太子太
保諡文安有泉山集二十五卷

田按文安世有清德子庭棉庭機孫嫌煙皆官尙
書庭機嫌並得諡文又皆爲國子祭酒一家五尙書
三祭酒三世諡文非獨明代僅見古亦罕有其倫也
余檢李西涯集有賀文安得子詩云三鳳豈須誇薛

氏八龍今已半苟家縱極力頌
揚安能預測子姓如此之盛耶

越王臺懷古

乘閒獨上釣龍臺滿目興亡事可哀
宋主行宮惟綠草越王舊業半蒼苔
樓船東去家何在陵谷春深花自開
山色不知風景別還從江上送青來

陸容十七首

容字文量太倉州人成化丙戌進士
觀政工部授南

吏部主事改兵部歷員外郎中出為
浙江參政有式

齋稿浙藩稿歸田稿三十七卷

菽園雜記予未登第時未嘗作詩餘
天順己卯赴會試夢至一寺老僧出
卷求題予為一闕與之既覺猶記其半
云一片白雲人留不住一坐湖山人
積積雨此是怡情處及下第歸讀書海

丙籤卷五

六

甯寺僧文公出白雲窩卷求題宛如
夢中癸未會試嘗夢入贈詩云一篇
春水到底渾入指不見波瀾痕露
霖為我開天門至期貢院火蓋術
家有霹靂火之名而到底渾不見
痕如其兆矣田按參政與張亨父
陸鼎儀稱婁東三鳳所著菽園雜
記王守溪稱其佳篇究非專語性
靈者所得比擬參政自言登第後
始作詩餘而靜志居詩話云式齋
登第後始為詩豈末細檢菽園雜
記耶

送鼎儀

匍匐歸故里歡愉非昔時時窮天弗
閔心痲醫難治人欺鬼神侮四體
失自持所賴諸友生相將慰吾私
清談碧酒盡偶坐白日移隱憂為
之解春陽煦寒漸君茲忍予棄感
觸成傷悲文詞雜點竄經史紛讐
疑于時跨門出躑躅將誰之敢云
巷無人而君故相知前秋別亭甫
戚戚心已危今春當君別

騷屑愈不支平生頗剛腸不解惜別離邂逅有此態瑣瑣成
何爲得非情意迫無乃志氣衰我辰將無良早歲逢百罹壯
心半墮墜似與林壑宜君誠青雲器夙抱經世資良時不易
得壯齒難久羈匡濟當自此行矣無遲遲

發鄆縣

孤眠愜曉涼登舟已云晏推窗望海隅日出煙未散雲山相
吐吞冉冉青不斷冥搜起遐思興到噴一岸涼風從何來吹
我鬢絲亂時無謝康樂居然發長歎

和李賓之止詩之作

陶翁謝麴生作詩示終止平生匪徇外此舉尤近裡昨聞詩
止詩一晒西涯子感時公是非遇事竊憂喜詩本具性情觸

丙籤卷五

七

之卽興起耽溺固可悲力止亦非理操觚與擲筆要在必由
已適意無勞神如此而已矣君看杜拾遺病肺泯江涘生無
濟世功藉此名千祀

城西草堂

抱藝客侯門歸來樂自存草堂幽傍郭花鳴曲通村靜坐開
書帙閒情付酒樽侯嬴今已矣心事與誰論

次孫汝貞韻

檢點牀頭舊酒樽煖來花下喚詩魂歌魚不逐人彈鋏題鳳
從教客過門粉署看雲眠白晝畫樓邀月坐黃昏廟堂身世
江湖樂一飯難忘聖主恩

積磧寺限韻

移舟來看九峯青古寺幽深試一經畫堵半昏支碧殿殘碑
欲斷倚朱櫺階前老樹知僧臘海上浮槎仰使星極目湖天
詩興遠片雲孤鶴過華亭

桐江夜行

櫓聲搖月下桐江短夢驚回午夜長道路勞人自甌越雲山
送我到錢塘還家正及迎春宴隨俗先愁賀歲忙行過釣臺
天已曙巨鰲須爲覓漁航

過公主廢宅

金屋重重瑣翠苔東風依舊燕飛來鳳簫聲歇春無主牢落
宮花幾度開

僊人宮

丙籤卷五

六

野樹無名花氣香古碑橫卧薜痕蒼僊人已去空陰洞滿地
白雲春晝長

題畫

餘寒歷盡見春工一樹疏梅霽雪中破履短筇詩自好不知
吟過小橋東

南郊

卧擁明衣席未安齋郎早已報登壇君王行處陽春在不用
靈犀避夜寒

紅梅

面面春紅試曉粧天然肌骨耐冰霜東坡居士如相識肯爇
銀燭照海棠

題畫

林屋重重枕野塘
水花千頃一歸航
何年了卻公家事
來趁山人幾日涼

杏花便面

海霞薰染玉容酣
不逐東風上舞衫
記得春來曾識面
相公莊在午橋南

海甯道中

溪上漁人已曬罾
晚風吹浪碧層層
不知歸去了鬢女
浮甕如船坐採菱

臨安道中

修篁高樹綠依依
路繞青山見日稀
城市炎風吹不到
只愁空翠濕人衣

空翠濕人衣

將之新城復經於潛

青山高下綠陰稠
觸暑登程且未休
莫笑癡兒了公事
從容只作看山遊

韓文一首

文字貫道洪洞人
成化丙戌進士授工科給事中出
爲湖廣參議歷山東參政雲南布政使擢右副都御
史巡撫湖廣改河南入拜戶部侍郎改吏部進南兵
部尙書改戶部以劾劉瑾罷官瑾誅復職加太子太
保贈太傅諡忠定有忠定集四卷

田按忠定詩音調高爽在錦衣獄時與劉忠宣唱和不綴人服其量

題送別卷爲張汝振致政還蘇州

翩翩車騎送君行路指東吳萬里程秋水長天渾入畫暮雲
春樹總關情身閒已遂吟邊樂官好還留去後名林下優游
無箇事任將詩酒樂餘生

潘禎一首

禎字應昌天台人成化丙戌進士官山東僉事

麓堂詩話陳公甫論詩專取聲最得要領潘禎應昌嘗謂子詩宮聲也子訝而問之潘言其父受於鄉先輩曰詩有五聲全備者少惟得宮聲者爲最優蓋可以兼衆聲也李太白杜子美之詩爲宮韓退之之詩爲角以此例之雖百家可知也子初欲求聲於詩不過心口相語聞潘言始自信以爲昔人先得我心也

看菊

獨憐九日在天涯夢繞東籬海上家千里一官空白首十年

丙籤卷五

五

雙眼又黃花

陸淵之一首

淵之字克深上虞人成化丙戌進士選庶吉士改禮

部主事出爲敘州知府終河南布政使有東臯集十

三卷

寄章德懋

嶺月江雲望眼枯美人猶自客南都別來多少知心語臨到

封題一字無

張海二首

海字文淵德州人成化丙戌進士授給事中歷都給

事中順天府丞出知鶴慶府遷太僕寺卿罷歸起兵

部侍郎謫山西參政

山左明詩鈔引治時吐魯番侵哈密文淵往經畧條上六事因言遠方不可加兵來則撫之去則拒絕之而已得命閉嘉峪關捕誅通番回夷而還孝宗以其無功謫山西參政攻李西涯送文淵詩云營平圖略本常事定遠功名非彼曹空庭搗穴豈不易亦赤子塗脂膏閉關卻使使亦有重念王業經營勞亦可見當時朝議所在非文淵之過也其後遂用師遂虜不久復為所據勞而無功文淵固未為失策矣

春閨曲 二首

小窗睡起坐來慵寶鴨香銷錦帳空可惜好花容易謝憑將

一笑買春風

夢回繡枕啟窗紗簾幙風輕燕子斜不信閒愁春不管平分

一半與梨花

林克賢 一首

丙籤卷五

克賢字一中黃巖人成化丙戌進士官福建僉事

卽事

落日荒荒照女牆輕陰閣雨過西廂無情最是新巢燕猶自

雙雙語畫梁

戴縉 一首

縉字子容南海人成化丙戌進士除監察御史歷尙寶司少卿擢右僉都御史進右副都御史右都御史

掌院事遷南工部尙書黜為民

田按尙書以附和汪直取敗詩頗明秀

夜泊武昌

奉節臨湘水維舟近楚城月明山犬吠夜靜水禽鳴戀關心

尤切思家夢未成何如訪仙侶投老學長生

丙籤卷五

三



小恩家夢未成何如訪仙侶投老學長生

